

ओं नमः परमात्मने, श्री महागणपतये नमः

श्री गुरुभ्यो नमः

हरिः ओं

--

कृष्ण यजुर्वेदीय तैत्तिरीय आरण्यकम्

प्रपाठकः 7 - 8

Table of Contents

7 कृष्ण यजुर्वेदीय तैत्तिरीय आरण्यके प्रथमः प्रपाठकः	7
7.1 सप्तमः प्रपाठकः	7
अनुवाकं-1	7
अनुवाकं-2	8
अनुवाकं-3	10
अनुवाकं-4	11
अनुवाकं-5	12
अनुवाकं-6	15
अनुवाकं-7	16
अनुवाकं-8	18
अनुवाकं-9	20
अनुवाकं-10	21
अनुवाकं-11	23
अनुवाकं-12	27
अनुवाकं-13	27
अनुवाकं-14	27

अनुवाकं-15.....	28
अनुवाकं-16.....	28
अनुवाकं-17.....	28
अनुवाकं-18.....	29
अनुवाकं-19.....	29
अनुवाकं-20.....	30
अनुवाकं-21.....	31
अनुवाकं-22.....	32
अनुवाकं-23.....	32
अनुवाकं-24	32
अनुवाकं-25.....	33
अनुवाकं-26.....	33
अनुवाकं-27.....	33
अनुवाकं-28.....	33
अनुवाकं-29.....	34
अनुवाकं-30.....	34
अनुवाकं-31	35
अनुवाकं-32.....	35

अनुवाकं-33.....	35
अनुवाकं-34.....	35
अनुवाकं-35.....	36
अनुवाकं-36.....	36
अनुवाकं-37.....	36
अनुवाकं-38.....	37
अनुवाकं-39.....	37
अनुवाकं-40	37
अनुवाकं-41.....	38
अनुवाकं-42	40
Appendix (of expansions).....	47
8 कृष्ण यजुर्वेदीय तैत्तिरीय आरण्यके अष्टमः प्रपाठकः	52
8.1 अष्टमः प्रपाठकः	52
अनुवाकम् - 1	52
अनुवाकम् - 2	55
अनुवाकम् - 3	60
अनुवाकम् - 4	64
अनुवाकम् - 5	69

अनुवाकम् - 6.....	71
अनुवाकम् - 7.....	76
अनुवाकम् - 8.....	82
अनुवाकम् - 9.....	88
अनुवाकम् - 10	92
अनुवाकम् - 11.....	95
अनुवाकम् - 12	97

=====

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

7 कृष्ण यजुर्वेदीय तैत्तिरीय आरण्यके प्रथमः प्रपाठकः

7.1 सप्तमः प्रपाठकः

अनुवाकं-1

T.A.7.1.1

नमो॑ वा॒चे या चो॑दिता या चानु॑दिता तस्यै॑ वा॒चे नमो॑ नमो॑ वा॒चे नमो॑
वा॒चस्प॑तये नम ऋ॒षिभ्यो॑ मन्त्र॑कृद्भ्यो मन्त्र॑पतिभ्यो मा मामृ॑षयो
मन्त्र॑कृतो मन्त्र॑पतयः परादु॑र्माऽहमृ॑षीन् मन्त्र॑कृतो मन्त्र॑पतीन् परादां॑
वैश्व॑देवीं वा॒चमु॑द्यासꣳ शि॒वाम॑दस्ताम् जुष्टा॑म् दे॒वेभ्यः॑ शर्म॑ मे द्यौः
शर्म॑ पृथि॒वी शर्म॑ विश्व॑मिदम् जगत् । शर्म॑ चन्द्र॑श्च सूर्य॑श्च शर्म॑
ब्रह्म॑प्रजापती । भूतं॑ वदि॒ष्ये भुव॑नं वदि॒ष्ये तेजो॑ वदि॒ष्ये यशो॑ वदि॒ष्ये
तपो॑ वदि॒ष्ये ब्रह्म॑ वदि॒ष्ये सत्यं॑ वदि॒ष्ये तस्मा॑ अहमि॒द-मु॑पस्तरण-
मु॑पस्तृण उप॑स्तरणम् मे प्रजा॑यै पशू॒नाम् भूया॑-दुप॑स्तरणमहम्
प्रजा॑यै पशू॒नाम् भूया॑सम् प्राणा॑पानौ मृत्यो॑र्मा पात॑म् प्राणा॑पानौ
मा मा हा॑सिष्टम् मधु॑ मनि॒ष्ये मधु॑ जनि॒ष्ये मधु॑ वक्ष्यामि॑ मधु॑

वदि॒ष्यामि॑ म॒धु॒मती॑म् दे॒वेभ्यो॑ वाचमु॒द्यास॑ शु॒श्रू॒षे॒ण्याम्॑
मनु॒ष्येभ्य॑स्तम् मा दे॒वा अव॑न्तु शो॒भायै॑ पि॒तरोऽनु॑मदन्तु ।
ओम् शान्तिः॑ शान्तिः॑ शान्तिः॑ । 1(4) (A1)

अनुवाकं-2

T.A.7.2.1

यु॒ञ्जते॑ मन॒ उत॑ यु॒ञ्जते॑ धि॒यः । वि॒प्रा वि॒प्रस्य॑ बृ॒हतो॑ वि॒पश्चि॑तः ।
वि हो॒त्रा द॑धे व॒युना॒विदे॑क इत् । म॒ही दे॒वस्य॑ स॒वितुः॑ परि॒ष्टुतिः॑ ।
दे॒वस्य॑ त्वा स॒वितुः॑ प्र॒सवे॑ । अ॒श्विनो॑र् बा॒हुभ्या॑म् ।
पू॒ष्णो ह॑स्ताभ्या॒माद॑दे । अ॒भ्रिर॑सि ना॒रिर॑सि ।
अ॒ध्वर॑कृद्-दे॒वेभ्यः॑ । उ॒त्तिष्ठ॑ ब्र॒ह्मण॑स्पते । 2 (10)

T.A.7.2.2

दे॒वय॑न्तस्त्वे॒महे॑ । उप॒ प्रय॑न्तु म॒रुतः॑ सु॒दान॑वः । इन्द्र॑ प्रा॒शूर्भ॑वा
स॒चा । प्रै॒तु ब्र॑ह्मण॒स्पतिः॑ । प्र दे॒व्येतु॑ सूनृ॒ता ।
अ॒च्छा वी॒रन्न॑र्यम् प॒ङ्क्ति॑राधसम् । दे॒वा य॒ज्ञन्न॑यन्तु नः ।
दे॒वी द्या॒वापृ॑थि॒वी अनु॑ मे म॒सा॒थाम् । ऋ॒द्ध्य॑सम॒द्य ।

म॒खस्य॑ शि॒रः । 3 (10)

T.A.7.2.3

म॒खाय॑ त्वा । म॒खस्य॑ त्वा शी॒र्ष्णे । इ॒यत्य॑ग्र॒ आसीः॑ । ऋ॒द्ध्य॑स॒मद्य॑ ।
म॒खस्य॑ शि॒रः । म॒खाय॑ त्वा । म॒खस्य॑ त्वा शी॒र्ष्णे । दे॒वीर् व॒म्री॑रस्य
भू॒तस्य॑ प्र॒थम॑जा ऋ॒ताव॑रीः । ऋ॒द्ध्य॑स॒मद्य॑ । म॒खस्य॑ शि॒रः । 4 (10)

T.A.7.2.4

म॒खाय॑ त्वा । म॒खस्य॑ त्वा शी॒र्ष्णे । इ॒न्द्रस्य॑ यौ॒जो॑ऽसि । ऋ॒द्ध्य॑स॒मद्य॑ ।
म॒खस्य॑ शि॒रः । म॒खाय॑ त्वा । म॒खस्य॑ त्वा शी॒र्ष्णे । अ॒ग्नि॑जा अ॒सि
प्र॒जाप॑ते रे॒तः । ऋ॒द्ध्य॑स॒मद्य॑ । म॒खस्य॑ शि॒रः । 5 (10)

T.A.7.2.5

म॒खाय॑ त्वा । म॒खस्य॑ त्वा शी॒र्ष्णे । आ॒युर् धे॑हि प्रा॒णम् धे॑हि ।
अ॒पा॒नम् धे॑हि व्या॒नम् धे॑हि । चक्षु॑र्धे॒हि श्रो॑त्रं धे॒हि । मनो॑ धे॒हि वाचं॑
धे॒हि । आ॒त्मानं॑ धे॒हि प्र॑तिष्ठां धे॒हि । मां धे॑हि म॒यि धे॑हि ।
म॒धु त्वा म॑धु॒ला क॑रोतु । म॒खस्य॑ शि॒रो॑ऽसि () । 6 (10)

T.A.7.2.6

य॒ज्ञस्य॑ प॒दे स्थः॑ । गा॒य॒त्रेण॑ त्वा छ॒न्दसा॑ करोमि । त्रै॒ष्टु॒भेन॑ त्वा

छन्दसा करोमि । जागतेन त्वा छन्दसा करोमि । मखस्य रास्नाऽसि ।
 अदितिस्ते बिलङ्गहातु । पाङ्केन छन्दसा । सूर्यस्य हरसा श्राय ।
 मखोऽसि । 7 (9) (पते – शिर – ऋतावरीर्. ऋद्ध्यासमद्य मखस्य
 शिरः – शिरः – शिरोऽसि – +नव च) (A2)

Special Korvai

(इयति देवीरिन्द्रस्यौजोऽस्यग्निजा अस्यायुर्द्धेहि प्राणम् पञ्च)

अनुवाक-3

T.A.7.3.1

वृष्णो अश्वस्य निष्पदसि । वरुणस्त्वा धृतव्रत आधूपयतु ।
 मित्रावरुणयोर् ध्रुवेण धर्मणा । अर्चिषे त्वा । शोचिषे त्वा ।
 ज्योतिषे त्वा । तपसे त्वा । अभीमम् महिना दिवम् ।
 मित्रो बभूव सप्रथाः । उत श्रवसा पृथिवीम् । 8 (10)

T.A.7.3.2

मित्रस्य चर्षणीधृतः । श्रवो देवस्य सानसिम् ।
 द्युम्नञ्चित्रश्रवस्तमम् । सिद्ध्यै त्वा । देवस्त्वा सवितोद्वपतु ।
 सुपाणिः स्वङ्गुरिः । सुबाहुरुत शक्त्या । अपद्यमानः पृथिव्याम् ।

आ॒शा दि॒श आ॒ पृ॒ण । उ॒त्ति॒ष्ठ बृ॒हन् भव॑ । 9 (10)

T.A.7.3.3

ऊ॒र्ध्व॒स्ति॒ष्ठ ध्रु॒वस्त्व॑म् । सू॒र्य॒स्य त्वा॒ चक्षु॑षाऽन्वी॒क्षे ॥ ऋ॒जवे॑ त्वा ।
सा॒धवे॑ त्वा । सु॒क्षित्यै॑ त्वा भू॒त्यै त्वा ॥ इ॒दम॑हममु॒मामु॑ष्यायणं वि॒शा
प॒शुभि॑र् ब्र॒ह्मव॑र्चसेन पर्यू॒हामि॑ । गा॒य॒त्रेण॑ त्वा छ॒न्दसा॑ ऽऽच्छृ॒णद्भि॑ ।
त्रै॒ष्टुभे॑न त्वा छ॒न्दसा॑ ऽऽच्छृ॒णद्भि॑ । जा॒गते॑न त्वा छ॒न्दसा॑ ऽऽच्छृ॒णद्भि॑ ।
छृ॒णत्तु॑ त्वा वाक् () । छृ॒णत्तु॑ त्वो॒र्क् । छृ॒णत्तु॑ त्वा ह॒विः ।
छृ॒न्धि वा॒चम् । छृ॒न्ध्यूर्ज॑म् । छृ॒न्धि ह॒विः ।
दे॒व पु॒रश्च॑र स॒ध्यास॑न्त्वा । 10 (16)

(पृ॒थि॒वीम् – भ॒व – वा॒क् षट्च॑) (A3)

अनुवाकं-4

T.A.7.4.1

ब्र॒ह्मन् प्र॒वर्ग्ये॑ण प्र॒चरि॑ष्यामः । हो॒तर् घ॒र्मम॑भिष्टु॒हि । अ॒ग्नी॒द्रौहि॑णौ
पु॒रोडा॑शावधि॒श्रय॑ । प्र॒तिप्र॑स्थात॒र्वि॒हर॑ । प्र॒स्तोतः॑ सा॒मानि॑ गा॒य ।
य॒जु॒र्यु॒क्तं साम॑भि॒रा॒क्त॒ख॒न्त्वा । वि॒श्वैर् दे॒वैरनु॑मतम् म॒रुद्भिः॑ ।

दक्षिणाभिः प्रततम् पारयिष्णुम् । स्तुभो वहन्तु सुमनस्यमानम् ।

स नो रुचन्धेह्यहणीयमानः () । भूर्भुवस्सुवः ।

ओमिन्द्रवन्तः प्रचरत । 11 (12) (अहणीयमानो द्वे च) (A4)

अनुवाकं-5

T.A.7.5.1

ब्रह्मन् प्रचरिष्यामः । होतर् घर्ममभिष्टुहि । यमाय त्वा मखाय त्वा ।

सूर्यस्य हरसे त्वा । प्राणाय स्वाहा व्यानाय स्वाहा उपानाय स्वाहा ॥

चक्षुषे स्वाहा श्रोत्राय स्वाहा । मनसे स्वाहा वाचे सरस्वत्यै स्वाहा ॥

दक्षाय स्वाहा क्रतवे स्वाहा । ओजसे स्वाहा बलाय स्वाहा ॥

देवस्त्वा सविता मद्ध्वाऽनक्तु । 12 (10)

T.A.7.5.2

पृथिवीं तपसस्त्रायस्व । अर्चिरसि शोचिरसि ज्योतिरसि तपोऽसि ।

सऽसीदस्व महाऽ असि । शोचस्व देववीतमः । वि धूममग्ने

अरुषम् मियेद्ध्य । सृज प्रशस्त दर्शतम् । अज्जन्ति यम्

प्रथयन्तो न विप्राः । वपावन्तन्नाग्निना तपन्तः ।

पितु॑र्न पु॒त्र उप॑सि प्रे॒ष्ठः । आ घ॒र्मो अ॒ग्निमृ॑तयन्नसादीत् । 13 (10)

T.A.7.5.3

अ॒नाधृ॑ष्या पु॒रस्ता॑त् । अ॒ग्नेरा॑धिपत्ये । आ॒यु॒र्मे दाः॑ । पु॒त्रव॑ती
दक्षि॑णतः । इन्द्र॑स्याधिपत्ये । प्र॒जाम् मे॑ दाः । सु॒षदा॑ पश्चात् ।
दे॒वस्य॑ सवि॒तुरा॑धिपत्ये । प्रा॒णम् मे॑ दाः । आ॒श्रुति॑रुत्तरतः । 14 (10)

T.A.7.5.4

मि॒त्रावरु॑णयो॒राधि॑पत्ये । श्रो॒त्रम् मे॑ दाः । वि॒धृति॑रुपरि॒ष्टात् ।
बृ॒हस्प॑ते॒राधि॑पत्ये । ब्र॒ह्म मे॑ दाः क्ष॒त्रम् मे॑ दाः । ते॒जो मे॑ धा॒ वर्चो॑
मे॒ धाः । यशो॑ मे॒ धा स्त॑पो मे॒ धाः । मनो॑ मे॒ धाः ।
मनो॑रश्वा॒ऽसि भू॑रिपु॒त्रा । वि॒श्वाभ्यो॑ मा ना॒ष्ट्राभ्यः॑ पाहि । 15 (10)

T.A.7.5.5

सू॒पस॑दा मे॒ भूया॑ मा मा हि॒ऽसीः । तपो॑ ष्व॒ग्ने अ॒न्तरा॑ऽमि॒त्रान् ।
तपा॑श॒ऽसम॑रुषः परस्य । तपा॑ वसो चि॒कितानो॑ अचि॒त्तान् ।
वि ते॑ तिष्ठन्ताम॒जरा॑ अ॒यासः॑ । चि॒तः स्थ॑ परि॒चितः॑ ।
स्वाहा॑ मरु॒द्धिः परि॑श्रयस्व । मा अ॑सि । प्र॒मा अ॑सि ।
प्र॒तिमा॑ अ॒सि । 16 (10)

T.A.7.5.6

स॒म्मा अ॑सि । वि॒मा अ॑सि । उ॒न्मा अ॑सि । अ॒न्तरि॑क्षस्यान्तर्द्धि॑रसि ।
दि॒वन्त॑प॒सस्त्रा॑यस्व । आ॒भिर् गी॒र्भिर् यद॑तो न ऊ॒नम् । आ॒प्याय॑य
हरि॒वो वर्द्ध॑मानः । य॒दा स्तो॑तृभ्यो म॒हि गो॑त्रा रु॒जासि॑ । भू॒यिष्ठ॑भाजो
अ॒ध ते॑ स्याम । शु॒क्रन्ते॑ अ॒न्यद् य॑ज॒तन्ते॑ अ॒न्यत् । 17 (10)

T.A.7.5.7

वि॒षुरूपे॑ अ॒हनी॑ द्यौरि॒वासि॑ । वि॒श्वा हि॑ मा॒या अ॑व॒सि स्व॑धावः ।
भ॒द्रा ते॑ पू॒षन्नि॒ह रा॒तिर॑स्तु । अ॒र्हन् बि॒भर्षि॑ सा॒यका॑नि ध॒न्व ।
अ॒र्हन्नि॒ष्कं य॑ज॒तं वि॒श्वरूप॑म् । अ॒र्हन्नि॒दं द॑यसे वि॒श्व-म॑ब्भुवम् ।
न वा ओ॒जीयो॑ रु॒द्र त्वद॑स्ति । गा॒यत्र॑म॒सि । त्रै॒ष्टुभ॑म॒सि ।
जा॒गत॑म॒सि () । म॒धु म॒धु म॒धु । 18 (11)

(अ॒न - क्त्व॒सादी॑ - दु॒त्तर॑तः - पा॒हि - प्र॒तिमा॑ अ॒सि - य॑ज॒तन्ते॑
अ॒न्यज् - जा॒गत॑म॒स्यैकं॑ च) (A5)

अनुवाकं-6

T.A.7.6.1

द॒श प्रा॒चीर्द॑श॒ भा॒सि द॒क्षि॒णा । द॒श प्र॒ती॒चीर्द॑श॒ भा॒स्यु॒दी॒चीः ।
द॒शोर्ध्वा॒ भा॒सि सु॒मन॒स्यमा॑नः । स नो॒ रुच॑न्धे॒ह्यह॑णीय॒मानः॑ ।
अ॒ग्नि॒ष्ट्वा व॒सुभिः॑ पु॒रस्ता॑द्-रोच॒यतु॑ गा॒यत्रे॑ण छ॒न्दसा॑ ।
स मा॑ रुचि॒तो रो॑चय । इन्द्र॑स्त्वा रु॒द्रैर्-द॒क्षि॒णतो॑ रोच॒यतु॑ त्रै॒ष्टुभे॑न
छ॒न्दसा॑ । स मा॑ रुचि॒तो रो॑चय । वरु॑णस्त्वाऽऽदि॒त्यैः प॒श्चाद्-रो॑चयतु
जा॒गते॑न छ॒न्दसा॑ । स मा॑ रुचि॒तो रो॑चय । 19 (10)

T.A.7.6.2

द्यु॒ता॒नस्त्वा॑ मा॒रुतो॑ मरु॒द्भि॒रुत्त॑रतो रोच॒यत्वा॑नु॒ष्टुभे॑न छ॒न्दसा॑ । स मा॑
रुचि॒तो रो॑चय । बृ॒हस्प॑तिस्त्वा वि॒श्वैर् दे॒वैरु॑परि॒ष्टाद्-रो॑चयतु पा॒ङ्केन॑
छ॒न्दसा॑ । स मा॑ रुचि॒तो रो॑चय । रो॒चि॒तस्त्व॑म् दे॒व घ॑र्म दे॒वेष्व॑सि ।
रो॒चि॒षी॒याह॑म् म॒नुष्ये॑षु । स॒म्राड् घ॑र्म रुचि॒तस्त्वं
दे॒वेष्वा॑युष्मा॒ऽस्ते॑ज॒स्वी ब्र॑ह्मवर्च॒स्यसि॑ । रुचि॒तोऽह॑म्
म॒नुष्ये॑ष्वायुष्मा॒ऽस्ते॑ज॒स्वी ब्र॑ह्मवर्च॒सी भू॑यासम् । रु॒गसि॑ ।

रुच॑म् म॒यि धे॑हि () । 20 (10)

T.A.7.6.3

म॒यि रुक् । द॒श पु॒रस्ताद्-रो॑चसे । द॒श दक्षि॑णा । द॒श प्र॒त्यङ्ङ् ।

द॒शोदङ्ङ् । द॒शोर्ध्वो॑ भा॒सि सु॒मन॑स्य॒मानः॑ ।

स नः॑ स॒म्राडि॑षमूर्जम् धे॑हि । वा॒जी वा॒जिने॑ पवस्व ।

रो॒चि॒तो घ॒र्मो रु॒चीय॑ । 21 (9) (रो॒चय॑ – धे॑हि – +नव॑ च) (A6)

अनुवाकं-7

T.A.7.7.1

अप॑श्यङ्गो॒पाम॑निपद्य॒मानम् । आ च॑ परा॒ च प॒थिभि॑श्चरन्तम् ।

स स॒द्ध्री॑चीः स वि॒षूची॑र्वसानः । आ व॑रीवर्ति॒ भुव॑नेष्वन्तः ।

अत्र॑ प्रा॒वीः । मधु॑ मा॒द्ध्वी॑भ्याम् मधु॑ मा॒धूची॑भ्याम् ।

अनु॑ वाम् दे॒ववी॑तये । स॒मग्नि॑र॒ग्निना॑ गत । स॒म् दे॒वेन॑ स॒वित्रा॑ ।

सꣳ सूर्ये॑ण रोचते । 22 (10)

T.A.7.7.2

स्वाहा॑ स॒मग्नि॑स्तपसा॒ गत॑ । स॒म् दे॒वेन॑ स॒वित्रा॑ । सꣳ सूर्ये॑णारोचिष्ट ।

ध॒र्ता दि॒वो वि॒भासि॑ रज॒सः । पृ॒थि॒व्या ध॒र्ता । उ॒रोर॑न्तरि॒क्षस्य॑ ध॒र्ता ।

ध॒र्ता दे॒वो दे॒वाना॑म् । अ॒मर्त्य॑स्तपो॒जाः । ह॒दे त्वा॑ म॒नसे॑ त्वा ।
दि॒वे त्वा॑ सू॒र्याय॑ त्वा । 23 (10)

T.A.7.7.3

ऊ॒र्ध्वमि॒म-म॑ध्व॒रङ्ग॑धि । दि॒वि दे॒वेषु॑ हो॒त्रा य॑च्छ । वि॒श्वा॒साम् भु॒वाम्
प॑ते । वि॒श्वस्य॑ भु॒वन॑स्प॒ते । वि॒श्वस्य॑ म॒नस॑स्प॒ते । वि॒श्वस्य॑ व॒चस॑स्प॒ते ।
वि॒श्वस्य॑ त॒पस॑स्प॒ते । वि॒श्वस्य॑ ब्र॒ह्मण॑स्प॒ते । दे॒वश्रू॑स्त्व॒न्दे॒व घ॑र्म
दे॒वान् पा॑हि । त॒पो॒जां वा॑च॒मस्मो॑ नि॒यच्छ॑ दे॒वायु॑वम् । 24 (10)

T.A.7.7.4

ग॒र्भो दे॒वाना॑म् । पि॒ता म॑ती॒नाम् । प॒तिः प्र॒जाना॑म् । म॒तिः क॒वीना॑म् ।
स॒न्दे॒वो दे॒वेन॑ स॒वित्रा॑ऽय॒तिष्ठ॑ । सꣳ सू॒र्येणा॑रु॒क्त । आ॒यु॒र्दास्त्व॑म॒स्मभ्यं॑
घ॑र्म व॒र्चो॒दा अ॑सि । पि॒ता नो॑ऽसि पि॒ता नो॑ बो॒ध । आ॒यु॒र्द्धास्त॑नू॒धाः
प॑यो॒धाः । व॒र्चो॒दा व॑रि॒वो॒दा द्र॑वि॒णो॒दाः । 25 (10)

T.A.7.7.5

अ॒न्तरि॑क्ष॒प्र उ॒रोर्व॑री॒यान् । अ॒शीम॑हि॒ त्वा मा॑ मा॒ हिꣳसीः॑ । त्व॑म॒ग्ने
गृ॒हप॑तिर्-वि॒शाम॑सि । वि॒श्वा॒साम् मा॑नु॒षीणा॑म् । श॒तम् पू॒र्भिर्य॑विष्ठ

पा॒ह्य॒ह॒सः । स॒मे॒ध्वा॒र॒श् श॒त॒श् हि॒माः । तं द्रा॒वि॒ण॒श् हा॒र्दि॒वा॒न॒म् ।
 इ॒है॒व रा॒तयः॑ स॒न्तु । त्व॒ष्टी॒मती॑ ते स॒पे॒य । सु॒रे॒ता रे॒तो द॒धा॒ना () ।
 वी॒रं वि॒दे॒य तव॑ स॒न्दृ॒शि । मा॒ऽह॒श् रा॒य॒स्पो॒षे॒ण वि॒ यो॒ष॒म् । 26 (12)
 (रो॒च॒ते – सू॒र्य॒य त्वा – दे॒वा॒यु॒वं – द्रा॒वि॒णो॒दा –
 द॒धा॒ना द्वे च॑) (A7)

अनुवाकं-8

T.A.7.8.1

दे॒वस्य॑ त्वा स॒वि॒तुः प्र॒स॒वे । अ॒श्वि॒नो॒र् बा॒हु॒भ्या॒म् । पू॒ष्णो
 ह॒स्ता॒भ्या॒मा द॒दे । अ॒दि॒त्यै रा॒स्ना॒ऽसि॑ । इ॒ड ए॒हि । अ॒दि॒त ए॒हि ।
 स॒र॒स्व॒त्ये॒हि । अ॒सा॒वे॒हि । अ॒सा॒वे॒हि । अ॒सा॒वे॒हि । 27 (10)

T.A.7.8.2

अ॒दि॒त्या उ॒ष्णी॒ष॒म॒सि॑ । वा॒यु॒र॒स्यै॒डः । पू॒षा त्वो॒पा॒व॒सृ॒ज॒तु॑ ।
 अ॒श्वि॒भ्या॒म् प्र दा॒प॒य । य॒स्ते स्त॒नः श॒श॒यो यो म॒यो॒भूः ।
 ये॒न वि॒श्वा पु॒ष्य॒सि वा॒र्या॒णि । यो र॒त्न॒धा व॒सु॒वि॒द्यः सु॒द॒त्रः । स॒र॒स्व॒ति
 त॒मि॒ह धा॒त॒वे॒ऽकः॑ । उ॒स्र घ॒र्म॒श् शि॒ष् । उ॒स्र घ॒र्म॒म् पा॒हि । 28 (10)

T.A.7.8.3

घ॒र्मा॒य॒ शि॒ष् । बृ॒ह॒स्प॒ति॒स्त्वो॒प॒सी॒दतु॑ । दा॒न॒वः॑ स्थ॒ पे॒र॒वः॑ ।
वि॒ष्व॒ग्वृ॒तो लो॒हि॒तेन॑ । अ॒श्वि॒भ्याम्॑ पि॒न्व॒स्व । सर॑स्व॒त्यै पि॒न्व॒स्व ।
पू॒ष्णे पि॒न्व॒स्व । बृ॒ह॒स्प॒तये॑ पि॒न्व॒स्व । इ॒न्द्रा॒य पि॒न्व॒स्व ।
इ॒न्द्रा॒य पि॒न्व॒स्व । 29 (10)

T.A.7.8.4

गा॒य॒त्रो॒ऽसि॑ । त्रै॒ष्टु॒भो॒ऽसि॑ । जा॒ग॒त॒म॒सि॑ । स॒हो॒र्जो॒ भा॒गे॒नो॒प मे॒हि॑ ।
इ॒न्द्रा॒श्वि॒ना म॒धु॒नः॑ सा॒र॒घ॒स्य॑ । घ॒र्म॒म् पा॒त व॒स॒वो य॒ज॒ता व॒ट् ।
स्वा॒हा॒ त्वा सूर्य॑स्य र॒श्म॒ये वृ॒ष्टि॒व॒न॒ये जु॒हो॒मि॑ । म॒धु ह॒वि॒र॒सि॑ ।
सूर्य॑स्य त॒प॒स्त॒प । द्या॒वापृ॒थि॒वी॒भ्यां॑ त्वा परि॒गृ॒ह्णामि॑ () । 30 (10)

T.A.7.8.5

अ॒न्त॒रि॒क्षे॒ण त्वो॒प॒य॒च्छामि॑ । दे॒वा॒नां॑ त्वा पि॒तृ॒णा॒म॒नु॒मतो॑ भ॒र्तु॑
श॒के॒य॒म् । ते॒जो॒ऽसि॑ । ते॒जो॒ऽनु॒प्रे॒हि॑ । दि॒वि॒स्पृ॒ङ्मा मा॑ हि॒ऽसीः॑ ।
अ॒न्त॒रि॒क्ष॒स्पृ॒ङ्मा मा॑ हि॒ऽसीः॑ । पृ॒थि॒वि॒स्पृ॒ङ्मा मा॑ हि॒ऽसीः॑ ।
सु॒व॒र॒सि॒ सु॒व॒र्मे॑ य॒च्छ । दि॒वं यँ॑ च्छ दि॒वो मा॑ पा॒हि॑ । 31 (9)

(एहि – पाहि – पिन्वस्व – गृह्णामि – +नव च) (A8)

अनुवाकं-9

T.A.7.9.1

समु॒द्राय॑ त्वा वा॒ताय॑ स्वाहा॑ । स॒लिला॑य त्वा वा॒ताय॑ स्वाहा॑ ।
अ॒नाधृ॑ष्याय त्वा वा॒ताय॑ स्वाहा॑ । अ॒प्रतिधृ॑ष्याय त्वा वा॒ताय॑ स्वाहा॑ ।
अ॒वस्य॑वे त्वा वा॒ताय॑ स्वाहा॑ । दु॒वस्व॑ते त्वा वा॒ताय॑ स्वाहा॑ ।
शि॒मिद्व॑ते त्वा वा॒ताय॑ स्वाहा॑ । अ॒ग्नये॑ त्वा व॒सुम॑ते स्वाहा॑ । सो॒माय॑
त्वा रु॒द्रव॑ते स्वाहा॑ । व॒रुणा॑य त्वाऽऽदि॒त्यव॑ते स्वाहा॑ । 32 (10)

T.A.7.9.2

बृ॒हस्प॑तये त्वा वि॒श्वदे॑व्याव॒ते स्वाहा॑ । स॒वित्रे॑ त्व॒र्भुम॑ते वि॒भुम॑ते
प्र॒भुम॑ते वा॒जव॑ते स्वाहा॑ । य॒माय॑ त्वाऽङ्गि॒रस्व॑ते पि॒तृम॑ते स्वाहा॑ ।
वि॒श्वा आ॑शा दक्षि॒णस॑त् । वि॒श्वान् दे॒वान॑याडिह । स्वाहा॑कृतस्य
घ॒र्मस्य॑ । म॒धोः पि॑बतमश्चि॒ना । स्वाहा॑ऽग्नये॑ य॒ज्ञिया॑य ।
शं य॑जु॒र्भिः । अ॒श्विना॑ घ॒र्मम् पा॑त॒ऽहर्दि॑वानम् । 33 (10)

T.A.7.9.3

अ॒हर्-दि॒वाभि॑-रू॒तिभिः॑ । अनु॑ वा॒न् द्या॒वापृ॑थि॒वी म॑ञ्सा॒ताम् ।
 स्वा॒हेन्द्रा॑य । स्वा॒हेन्द्रा॑वट् । घ॒र्मम॑पा॒तम॑श्चि॒ना हा॑र्दि॒वानम् ।
 अ॒हर्-दि॒वाभि॑रू॒तिभिः॑ । अनु॑ वा॒न् द्या॒वापृ॑थि॒वी अ॑म॒ञ्सा॒ताम् ।
 तम् प्रा॒व्यं य॑था वट् । नमो॑ दि॒वे । नमः॑ पृ॒थिव्यै॑ () । 34 (10)

T.A.7.9.4

दि॒वि धा॑ इ॒मं य॑ज्ञम् । य॒ज्ञमि॑मं दि॒वि धाः॑ । दि॒वङ्ग॑च्छ ।
 अ॒न्तरि॑क्षङ्ग॑च्छ । पृ॒थि॒वीङ्ग॑च्छ । पञ्च॑ प्र॒दिशो॑ गच्छ ।
 दे॒वान् घ॑र्म॒पान् ग॑च्छ । पि॒तृन् घ॑र्म॒पान् ग॑च्छ । 35 (8)
 (आ॒दि॒त्यव॑तो॒ स्वाहा॑-हा॒र्दि॒वानम्-पृ॑थि॒व्या-+अ॒ष्टौ च॑) (A9)

अनुवाकं-10

T.A.7.10.1

इ॒षे पी॑पिहि । ऊ॒र्जे पी॑पिहि । ब्र॒ह्म॒णे पी॑पिहि । क्ष॒त्राय॑ पीपिहि ।
 अ॒द्भ्यः पी॑पिहि । ओ॒ष॒धी॒भ्यः पी॑पिहि । व॒नस्प॑ति॒भ्यः पी॑पिहि ।
 द्या॒वापृ॑थि॒वीभ्या॑म् पीपिहि । सु॒भू॒ताय॑ पीपिहि ।
 ब्र॒ह्मव॑र्च॒साय॑ पीपिहि । 36 (10)

T.A.7.10.2

यज॑मानाय पी॒पिहि॑ । मह्य॑ञ्ज्यै॒ष्ठ्याय॑ पी॒पिहि॑ । त्विष्यै॑ त्वा ।
द्यु॒म्नाय॑ त्वा । इ॒न्द्रियाय॑ त्वा भू॒त्यै त्वा । धर्मा॑ऽसि सु॒धर्मा मे॑ न्यस्मो॑ ।
ब्र॒ह्माणि॑ धारय । क्ष॒त्राणि॑ धारय । वि॒शन्धारय॑ ।
ने॒त्वा वा॑तः स्क्॒न्दया॑त् । 37 (10)

T.A.7.10.3

अमु॑ष्य त्वा प्रा॒णे सा॑दयामि । अमु॑ना सह नि॒रर्थ॑ङ्गच्छ । योऽस्मा॑न्
द्वेष्टि॑ । यञ्च॑ वयं द्वि॒ष्मः । पू॒ष्णे शर॑से स्वाहा॑ । ग्रा॒वभ्यः॑ स्वाहा॑ ।
प्रति॑रेभ्यः स्वाहा॑ । द्या॒वापृ॑थि॒वीभ्या॑ स्वाहा॑ । पि॒तृभ्यो॑ घ॒र्मपे॑भ्यः
स्वाहा॑ । रु॒द्राय॑ रु॒द्रहो॑त्रे स्वाहा॑ । 38 (10)

T.A.7.10.4

अ॒हर् ज्यो॑तिः के॒तुना॑ जुषताम् । सु॒ज्योति॑र् ज्योति॒षा स्वाहा॑ ।
रा॒त्रिर्ज्यो॑तिः के॒तुना॑ जुषताम् । सु॒ज्योति॑र्-ज्योति॒षा स्वाहा॑ ।
अपी॑परो माऽहो॑ रा॒त्रियै॑ मा पाहि । ए॒षा ते॑ अ॒ग्ने स॑मि॒त् ।
तया॑ स॒मिद्ध्य॑स्व । आ॒युर्मे॑ दाः । वर्च॑सा माऽञ्जीः ।

अपी॑परो॒ मा रा॒त्रिया॑ अ॒हो मा पा॑हि । 39 (10)

T.A.7.10.5

ए॒षा ते॑ अ॒ग्ने स॒मित् । तया॑ स॒मिद्ध्य॑स्व । आ॒यु॒र्मे दाः॑ । वर्च॑सा
माऽज्जीः॑ । अ॒ग्निर्-ज्यो॑तिर्-ज्यो॑तिर॒ग्निः स्वाहा॑ । सूर्यो॑ ज्यो॑तिर्-
ज्यो॑तिः सूर्यः॑ स्वाहा॑ । भूः स्वाहा॑ । हु॒त॒ ह॒विः । मधु॑ ह॒विः ।
इन्द्र॑तमे॒ऽग्नौ () । 40 (10)

T.A.7.10.6

पि॒ता नो॑ऽसि मा मा हि॒सीः । अ॒श्याम॑ ते दे॒वघ॑र्म । मधु॑मतो
वाज॑वतः पि॒तु॒मतः॑ । अ॒ङ्गिर॑स्वतः स्वधा॒विनः॑ । अ॒शीम॑हि त्वा
मा मा हि॒सीः । स्वाहा॑ त्वा सूर्य॑स्य र॒श्मिभ्यः॑ ।
स्वाहा॑ त्वा नक्ष॑त्रेभ्यः । 41 (7)

(ब्र॒ह्मव॑र्चसाय॑ पी॒पिहि॑ – स्क॒न्दया॑द् – रु॒दाय॑ रु॒द्रहो॑त्रे स्वाहा –
ऽहो॑ मा पा॒ह् – य॒ग्नौ – +स॒प्त च॑) (A10)

अनुवाकं-11

T.A.7.11.1

घ॒र्म या ते॑ दि॒वि शुक्॑ । या गा॑य॒त्रे छ॑न्द॒सि । या ब्रा॑ह्म॒णे ।

या ह॒वि॒र्द्ध॒नि॒ । तान्त॑ ए॒ते॒ना॒व॒य॒जे॒ स्वा॒हा॑ । घ॒र्म॒ या ते॑ऽन्त॒रि॒क्षे॑ शु॒क् ।
या त्रै॒ष्टु॒भे॒ छन्द॑सि । या रा॒ज॒न्ये॑ । याऽऽग्नी॑द्धे । तान्त॑ ए॒ते॒ना॒व॒य॒जे॒
स्वा॒हा॑ । 42 (10)

T.A.7.11.2

घ॒र्म॒ या ते॑ पृ॒थि॒व्या॑ शु॒क् । या जा॒ग॒ते॑ छन्द॑सि । या वै॒श्ये॑ ।
या स॒द॒सि॑ । तान्त॑ ए॒ते॒ना॒व॒य॒जे॒ स्वा॒हा॑ । अनु॒नो॑ऽद्यानु॒म॒तिः{1} ।
अ॒न्वि॒द॒नु॒म॒ते॒ त्वम् {2} । दि॒व॒स्त्वा॑ प॒र॒स्पा॒याः॑ ।
अ॒न्त॒रि॒क्ष॒स्य॑ त॒नु॒वः॑ पा॒हि॒ । पृ॒थि॒व्या॑स्त्वा॒ ध॒र्म॒णा॑ । 43 (10)

T.A.7.11.3

व॒य॒म॒नु॒क्रा॒मा॒म॒ सु॒वि॒ता॒य॒ न॒व्य॑से । ब्र॒ह्म॒ण॒स्त्वा॑ प॒र॒स्पा॒याः॑ । क्ष॒त्र॒स्य॑
त॒नु॒वः॑ पा॒हि॒ । वि॒श॒स्त्वा॑ ध॒र्म॒णा॑ । व॒य॒म॒नु॒क्रा॒मा॒म॒ सु॒वि॒ता॒य॒ न॒व्य॑से ।
प्रा॒ण॒स्य॑ त्वा प॒र॒स्पा॒यै॑ । चक्षु॑षस्त॒नु॒वः॑ पा॒हि॒ । श्रो॒त्र॒स्य॑ त्वा ध॒र्म॒णा॑ ।
व॒य॒म॒नु॒क्रा॒मा॒म॒ सु॒वि॒ता॒य॒ न॒व्य॑से । व॒ल्गु॑र॒सि॒ शं॑ यु॒धा॒याः॑ । 44 (10)

T.A.7.11.4

शि॒शु॒र्-ज॒न॒धा॒याः॑ । श॒ञ्च॑ व॒क्षि॑ प॒रि॑ च व॒क्षि॑ ।
च॒तुः॑ स॒क्ति॒र्ना॒भि॒र् । ऋ॒त॒स्य॑ । स॒दो॑ वि॒श्वा॒युः॑ श॒र्म॑ स॒प्र॒थाः॑ ।

अप॒ द्वेषो॑ अप॒ ह॒रः । अ॒न्यद्व॑तस्य स॒श्रिम॑ ।
 घ॒र्मै॒तत् ते॑ऽन्नमे॒तत् पु॒रीष॑म् । तेन॒ व॒र्द्धस्व॑ चा॒ च प्या॑यस्व ।
 व॒र्द्धिषी॑महि॒ च व॒यम् । आ॒ च प्या॑सिषी॒महि॑ । 45 (10)

T.A.7.11.5

र॒न्तिर्-ना॒मासि॑ दि॒व्यो ग॑न्धर्वः । तस्य॑ ते प॒द्व॒र्द्धवि॒र्द्धान॑म् ।
 अ॒ग्नि॒रद्व्य॑क्षाः । रु॒द्रोऽधि॑पतिः । स॒मह॑मायुषा । स॒म् प्रा॑णेन ।
 सं व॑र्चसा । स॒म् प॑यसा । स॒ङ्गौप॑त्येन । स॒ꣳ रा॑यस्पोषेण । 46 (10)

T.A.7.11.6

व्य॒सौ । योऽस्मा॑न् द्वेष्टि॑ । यञ्च॑ व॒यं द्वि॑ष्मः । अ॒चि॒क्रद॑द्वृषा॒ हरिः॑ ।
 म॒हान्-मि॒त्रो न॑ द॒र्श॒तः । स॒ꣳ सूर्ये॑ण रोचते । चि॒द॒सि स॒मु॒द्रयो॑निः ।
 इ॒न्दुर् दक्षः॑ श्येन॒ ऋ॒तावा॑ । हि॒र॒ण्य॒पक्षः॑ शकु॒नो भु॑रण्युः ।
 म॒हान्थ् स॒ध॒स्थे ध्रु॑व आ॒निष॑त्तः । 47 (10)

T.A.7.11.7

नम॑स्ते अस्तु॒ मा मा॑ हि॒ꣳसीः । वि॒श्वाव॑सुꣳ सोम॒ गन्ध॑र्वम् । आपो॑
 द॒दृशु॑षीः । तदृ॒तेना॑ व्या॒यन् । तद॒न्व॒वैत् । इ॒न्द्रो रा॑रहाण आ॒साम् ।
 परि॑ सूर्य॒स्य परि॑धीꣳ रप॒श्यत् । वि॒श्वाव॑सुर॒भि तन्नो॑ गृणातु । दि॒व्यो

गन्धर्वो रजसो विमानः । यद्वा घा सत्यमुत यन्न विद्म । 48 (10)

T.A.7.11.8

धियो हिन्वानो धिय इन्नो अव्यात् । सस्निमविन्दच्चरणे नदीनाम् ।
अपावृणोद्-दुरो अश्मव्रजानाम् । प्रासान् गन्धर्वो अमृतानि वोचत् ।
इन्द्रो दक्षम् परिजानादहीनम् । एतत्त्वम् देव घर्म देवो देवानुपागाः ।
इदमहम् मनुष्यो मनुष्यान् । सोमपीथानु मेहि । सह प्रजया सह
रायस्पोषेण । सुमित्रा न आप ओषधयः सन्तु () । 49 (10)

T.A.7.11.9

दुर्मित्रास्तस्मै भूयासुः । योऽस्मान् द्वेष्टि । यञ्च वयं द्विष्मः ।
उद्वयन्तमसस्परि {3} । उदुत्यं चित्रम् {4} । इमम् षु त्यमस्मभ्यञ्
सनिम् । गायत्रन्नवीयाञ्सम् । अग्ने देवेषु प्रवोचः । 50 (8)

(याऽऽग्नीद्ध्ये तान्ता एतेनावयजे स्वाहा – धर्मणा – शं युधायाः –
प्यासिषीमहि-पोषेण-निषत्तो-विद्म-सन्-+त्वष्टौ च) (A11)

अनुवाकं-12

T.A.7.12.1

म॒हीना॒म् प॒योऽ॒सि॒ वि॒हि॒तं दे॒व॒त्रा । ज्यो॒ति॒र्भा अ॒सि॒
व॒न॒स्प॒तीना॒मोष॑धी॒ना र॒सः । वा॒जि॒नम् त्वा वा॒जि॒नोऽव॑ न॒यामः॑ ।
ऊ॒र्ध्वम् मनः॑ सु॒वर्ग॑म् । 51(4) (A12)

अनुवाकं-13

T.A.7.13.1

अ॒स्कान् द्यौः पृ॒थि॒वीम् । अ॒स्कानृ॑ष॒भो यु॒वा गाः । स्क्व॑न्ने॒मा वि॒श्वा
भु॒व॒ना । स्क्व॑न्नो य॒ज्ञः प्र॒ज॒न॒य॒तु । अ॒स्कान॑ज॒नि प्रा॒ज॒नि ।
आ स्क्व॑न्नाज्जा॒य॒ते वृ॒षा । स्क्व॑न्नात् प्र॒ज॒नि॒षी॒म॒हि । 52 (7) (A13)

अनुवाकं-14

T.A.7.14.1

या पु॒र॒स्ताद् वि॒द्यु॒दा॒प॒तत् । तान्त॑ ए॒ते॒नाव॑ य॒जे स्वा॒हा ॥
या दक्षि॑ण॒तः । या प॒श्चात् । यो॒त्त॒र॒तः । यो॒परि॑ष्ठाद् वि॒द्यु॒दा॒प॒तत् ।
तान्त॑ ए॒ते॒नाव॑ य॒जे स्वा॒हा ॥ 53 (7) (A14)

अनुवाकं-15

T.A.7.15.1

प्रा॒णाय॑ स्वा॒हा॒ व्या॒नाय॑ स्वा॒हा॒ ऽपा॒नाय॑ स्वा॒हा॒ । चक्षु॑षे स्वा॒हा॒
श्रो॒त्राय॑ स्वा॒हा॒ । मन॑से स्वा॒हा॒ वा॒चे सर॑स्वत्यै
स्वा॒हा॒ । 54 (3) (A15)

अनुवाकं-16

T.A.7.16.1

पू॒ष्णे स्वा॒हा॒ पू॒ष्णे शर॑से स्वा॒हा॒ । पू॒ष्णे प्र॑प॒त्थ्याय॑ स्वा॒हा॒ पू॒ष्णे
नर॑न्धिषाय स्वा॒हा॒ । पू॒ष्णे ऽङ्घ्रि॑णये स्वा॒हा॒ पू॒ष्णे न॑रुणाय स्वा॒हा॒ ।
पू॒ष्णे सा॑के॒ताय॑ स्वा॒हा॒ । 55 (4) (A16)

अनुवाकं-17

T.A.7.17.1

उद॑स्य शु॒ष्माद् भा॒नुर्ना॑र्त बि॒भर्ति॑ । भा॒रम् पृ॑थि॒वी न भू॑म् । प्र शु॒क्रैर्तु॑
दे॒वी म॑नी॒षा । अ॒स्मत् सु॑त॒ष्टो रथो॑ न वा॒जी । अ॒र्चन्त॑ ए॒के म॑हि
सा॒म म॑न्वत । ते॒न सूर्य॑म॒धारय॑न् । ते॒न सूर्य॑म॒रोच॑यन् ।
घ॒र्मः शि॒रस्त॑द॒यम॑ग्निः । पु॒रीष॑म॒सि संप्रि॑यम् प्र॒जया॑ प॒शुभि॑र्भुवत् ।
प्र॒जाप॑तिस्त्वा साद॒यतु॑ ।

तया॑ दे॒वतया॑ ऽङ्गिर॒स्वद् ध्रु॒वा सी॑द । 56 (11) (A17)

अनुवाकं-18

T.A.7.18.1

यास्ते॑ अ॒ग्न आ॒र्द्रा यो॒नयो॑ याः कु॒लायि॑नीः । ये ते॑ अ॒ग्न इ॒न्द्रवो॑ या
उ ना॒भयः॑ । यास्ते॑ अ॒ग्ने त॒नुव ऊ॒र्जो ना॑म । ताभि॑स्त्वमु॒भयी॑भिः
सम्वि॑दानः । प्र॒जाभि॑र॒ग्ने द्र॒विणे॑ह सी॑द । प्र॒जाप॑तिस्त्वा सादयतु ।
तया॑ दे॒वतया॑ ऽङ्गिर॒स्वद् ध्रु॒वा सी॑द । 57 (7) (A18)

अनुवाकं-19

T.A.7.19.1

अ॒ग्निर॑सि वै॒श्वान॑रो॒ऽसि । सम्व॑त्सरो॒ऽसि प॑रिवत्सरो॒ऽसि ।
इ॒दाव॑त्सरो॒ऽसीदु॑वत्सरो॒ऽसि । इ॒द्वत्स॑रो॒ऽसि व॑त्सरो॒ऽसि । तस्य॑ ते
वस॑न्तः शि॒रः । ग्री॒ष्मो दक्षि॑णः प॒क्षः । व॒र्षाः पु॒च्छम् । श॒रदु॑त्तरः
प॒क्षः । हे॒मन्तो॑ म॒द्ध्यम् । पू॒र्वप॑क्षाश्चितयः () । अ॒पर॑पक्षाः पु॒रीष॑म् ।
अ॒होरा॑त्राणीष्टकाः । तस्य॑ ते मा॒साश्चा॒र्द्धमा॑साश्च कल्पन्ताम् ।
ऋ॒तव॑स्ते कल्पन्ताम् । सम्व॑त्स॒रस्ते॑ कल्पताम् । अ॒होरा॑त्राणि ते
कल्पन्ताम् । ए॒ति प्रे॒ति वी॒ति स॑मित्युदिति । प्र॒जाप॑तिस्त्वा सादयतु ।

तया दे॒वतयाऽङ्गि॒रस्वद् ध्रु॒वा सी॒द । 58 (19)

(चि॒तयो॑ न॒व च) (A19)

अनुवाकं-20

T.A.7.20.1

भूर्भु॒वस्सु॒वः । ऊ॒र्ध्व ऊ॒ षु॒ण ऊ॒तये॑ ॥ ऊ॒र्ध्वो नः॑ पा॒ह्य॒हसः॑ ।
वि॒धुन्द्र॒द्राण॑ सम॒ने ब॒हूना॑म् । यु॒वान॑ स॒न्तम् प॒लितो॑ ज॒गार ।
दे॒वस्य॑ प॒श्य का॒व्यम् म॒हित्वाऽद्या॑ म॒मार । स ह्यः॑ स॒मान ।
यदृ॒ते चि॒दभि॒श्रिषः॑ । पु॒रा ज॒र्तृभ्य॑ आ॒तृदः॑ ।
सन्धा॒ता स॒न्धिम् म॒घवा॑ पु॒रोव॒सुः । 59 (10)

T.A.7.20.2

निष्कर्ता॑ वि॒हृत॑म् पु॒नः । पु॒नरू॒र्जा{5}, स॒ह र॒य्या {6} । मा नो॑ घ॒र्म
व्यथि॑तो वि॒व्यथो॑ नः । मा नः॑ प॒रम॑ध॒रम्मा र॒जोऽनैः॑ । मो॒ष्वस्मा॑
स्तम॑स्यन्तरा॒ धाः ॥ मा रु॒द्रिया॑सो अ॒भिगु॑र्वृ॒धानः॑ । मा नः॑ क॒र्तुभिर्
हीडि॑ते॒भिर॒स्मान् । द्विषा॑ सु॒नीते॑ मा प॒रादाः॑ । मा नो॑ रु॒द्रो निर्ऋ॑ति॒र्मा
नो अ॒स्ता ॥ मा द्या॑वापृ॒थिवी॑ हीडिषा॒ताम् । 60 (10)

T.A.7.20.3

उप॑ नो॑ मि॒त्रावरु॑णावि॒हाव॑तम् । अ॒न्वादी॑द्ध्य॒थामि॑ह नः सखा॒या ।
 आ॒दि॒त्याना॑म् प्र॒सि॒तिर्हे॑तिः । उ॒ग्रा श॑तापा॒ष्ठा घ॒ वि॒षा परि॑णो वृ॒णक्तु॑ ।
 इ॒मम् मे॑ वरु॒ण{7}, त॒त्त्वा या॑मि{8} । त्व॒न्नो अ॒ग्ने{9},
 स त्व॒न्नो अ॒ग्ने{10} । त्व॒मग्ने॑ अ॒यासि॑{11} ।
 उ॒द्वय॑न्त॒मस॑स्परि {12} । उ॒दु॒त्यं॑{13}, चि॒त्रम् {14} ।
 वयः॑ सु॒पर्णाः {15} () । 61 (10)

(पु॒रो॒वसु॑र्ही॒डिषा॑ताꣳ सु॒पर्णाः) (A20)

अनुवाकं-21

T.A.7.21.1

भूर्भुव॑स्सुवः । मयि॑ त्यदि॒न्द्रिय॑म् म॒हत् । मयि॑ दक्षो॒ मयि॑ क्र॒तुः ।
 मयि॑ धायि सु॒वीर्य॑म् । त्रि॒शु॒ग्धर्मो॑ वि॒भातु॑ मे । आ॒कू॒त्या म॑न॒सा सह॑ ।
 वि॒राजा॒ ज्योति॑षा सह । य॒ज्ञेन॑ प॒यसा॑ सह । ब्र॒ह्मणा॑ ते॒जसा॑ सह ।
 क्ष॒त्रेण॑ यश॒सा सह॑ () । स॒त्येन॑ तप॒सा सह॑ । तस्य॑ दो॒हम॑शीमहि ।
 तस्य॑ सु॒म्नम॑शीमहि । तस्य॑ भ॒क्षम॑शीमहि । तस्य॑ त इ॒न्द्रेण॑ पी॒तस्य॑
 मधु॑मतः । उप॒हूत॑स्योप॒हूतो॑ भक्षयामि । 62 (16)

(यशसा सह षट्च) (A21)

अनुवाकं-22

T.A.7.22.1

यास्ते॑ अ॒ग्ने॑ घो॒रास्त॑नुवः । क्षु॒च्च॑ तृ॒ष्णा च॑ । अ॒स्नु॒क्चाना॑हुतिश्च ।
अ॒श॒नया॑ च पि॒पासा॑ च । से॒दि॒श्वाम॑तिश्च । ए॒तास्ते॑ अ॒ग्ने॑ घो॒रास्त॑नुवः ।
ताभि॑रमु॒ङ्गच्छ॑ । योऽ॒स्मान् द्वेष्टि॑ ।

यज्च॑ व॒यं द्वि॒ष्मः । 63 (9) (A22)

अनुवाकं-23

T.A.7.23.1

स्नि॒क्च॑ स्नी॒हि॒तिश्च॑ स्नि॒हि॒तिश्च॑ । उ॒ष्णा च॑ शी॒ता च॑ । उ॒ग्रा च॑ भी॒मा
च॑ । स॒दाम्नी॑ से॒दि॒रनि॑रा । ए॒तास्ते॑ अ॒ग्ने॑ घो॒रास्त॑नुवः । ताभि॑रमु॒ङ्गच्छ॑ ।
योऽ॒स्मान् द्वेष्टि॑ । यज्च॑ व॒यं द्वि॒ष्मः । 64 (8) (A23)

अनुवाकं-24

T.A.7.24.1

धु॒निश्च॑ ध्वा॒न्तश्च॑ ध्व॒नश्च॑ ध्व॒नय॑ञ्च । नि॒लि॒म्पश्च॑ वि॒लि॒म्पश्च॑

वि॒क्षि॒पः । 65 (2) (A24)

अनुवाकं-25

T.A.7.25.1

उग्रश्च धुनिश्च ध्वान्तश्च ध्वनश्च ध्वनय॑श्च ।
सहस॑हा॒श्च सह॑मानश्च सह॑स्वा॒श्च सही॑या॒श्च ।
ए॒त्य प्रे॑त्य वि॒क्षिपः॑ । 66 (3) (A25)

अनुवाकं-26

T.A.7.26.1

अ॒हो॒रा॒त्रे त्वो॑दी॒रय॑ताम् । अ॒र्द्ध॒मा॒सास्त्वो॑दी॒ जय॑न्तु ।
मा॒सास्त्वा श्र॑पयन्तु । ऋ॒तव॑स्त्वा प॒चन्तु॑ ।
स॒म् व॑त्स॒रस्त्वा ह॑न्त्वसौ । 67 (5) (A26)

अनुवाकं-27

T.A.7.27.1

खट् फ॒ड् ज॒हि । छि॒न्धी भि॒न्धी ह॒न्धी कट्॑ ।
इति॑ वा॒चः कू॒राणि॑ । 68 (3) (A27)

अनुवाकं-28

T.A.7.28.1

वि॒गा इ॒न्द्र वि॒चर॑न्त् स्पा॒शय॑स्व । स्व॒पन्त॑मिन्द्र प॒शुम॑न्तमिच्छ ।
व॒ज्रेणा॑मुम् बो॒धय॑ दुर्वि॒दत्र॑म् । स्व॒पतो॑ऽस्य प्र॒हर॑ भो॒जने॑भ्यः ।

अग्ने॑ अ॒ग्निना॑ स॒म्व॑दस्व । मृ॒त्यो मृ॒त्युना॑ स॒म्व॑दस्व । नमस्ते॑
अस्तु॑ भगवः । स॒कृत्ते॑ अग्ने॑ नमः । द्विस्ते॑ नमः । त्रिस्ते॑ नमः () ।
चतु॑स्ते नमः । पञ्च॑कृत्वस्ते॑ नमः । दश॑कृत्वस्ते॑ नमः ।
शत॑कृत्वस्ते॑ नमः । आस॑हस्रकृत्वस्ते॑ नमः । अ॒परि॒मित॑कृत्वस्ते॑
नमः । नमस्ते॑ अस्तु॑ मा मा हि॒प्सीः । 69 (17)

(त्रिस्ते॑ नमः स॒प्त च) (A28)

अनुवाकं-29

T.A.7.29.1

असृ॑न् मुखो॑ रु॒धिरे॒णाव्य॑क्तः । यम॑स्य दू॒तः श्र॑पाद्-विधा॑वसि ।
गृ॒द्ध्रः सु॒पर्णः कु॒णप॒न्निषे॑वसे । यम॑स्य दू॒तः प्र॑हितो॑ भव॑स्य
चो॒भयोः॑ । 70 (4) (A29)

अनुवाकं-30

T.A.7.30.1

यदे॒तद्-वृ॑क॒सो भू॒त्वा । वाग् दे॒व्यभि॑रायसि । द्विष॑न्तम् मे॒ऽभि॑राय ।
तम् मृ॒त्यो मृ॒त्यवे॑ नय । स आ॒र्त्याऽऽर्ति॑मा॒र्च्छतु॑ । 71 (5) (A30)

अनुवाकं-31

T.A.7.31.1

यदी॑षितो॒ यदि॑ वा स्व॒कामी॑ । भये॑डको॒ वद॑ति वाच॑मे॒ताम् ।

तामिन्द्रा॑ग्नी ब्र॒ह्मणा॑ सम्॑वि॒दानौ॑ ।

शि॒वाम॒स्मभ्यं॑ कृ॒णुत॑ङ्ग॒हेषु॑ । 72 (4) (A31)

अनुवाकं-32

T.A.7.32.1

दी॒र्घमु॒खि दुर्॑ह॒णु । मा स्म॑ दक्षि॒णतो॑ वदः॑ । यदि॑ दक्षि॒णतो॑ वदा॑द्

द्विष॑न्तम् मे॒ऽव बा॑धासै । 73 (3) (A32)

अनुवाकं-33

T.A.7.33.1

इ॒त्थादु॒लूक॑ आप॑प्तत् । हि॒र॒ण्याक्षो॑ अयो॒मुखः॑ । रक्ष॑सान्दू॒त आ॑गतः ।

तमि॑तो नाशया॒ग्ने । 74 (4) (A33)

अनुवाकं-34

T.A.7.34.1

यदे॒तद् भू॒तान्य॑न्वावि॒श्य । दै॒वीं वा॑चं वद॑सि । द्विष॑तो नः॒ परा॑वद ।

तान् मृ॒त्यो मृ॒त्यवे॑ नय । त आ॒र्त्याऽऽर्ति॑माच्छ॑न्तु ।

अ॒ग्निना॑ऽग्निः॒ सम्॑वद॒ताम् । 75 (6) (A34)

अनुवाकं-35

T.A.7.35.1

प्रसार्य॑ सक्थ्यौ॑ पत॑सि । स॒व्यमक्षि॑ नि॒पेपि॑ च ।

मे॒ह कस्य॑चनाम॒मत् । 76 (3) (A35)

अनुवाकं-36

T.A.7.36.1

अ॒त्रिणा॑ त्वा क्रि॒मे ह॑न्मि । क॒ण्वेन॑ ज॒मद॑ग्निना । वि॒श्वाव॑सोर् ब्र॒ह्मणा॑

ह॒तः । क्रि॒मीणा॑ꣳ रा॒जाꣳ । अ॒प्येषा॑ꣳ स्थ॒पति॑र्ह॒तः । अथो॑ मा॒ताऽथो॑

पि॒ता । अथो॑ स्थू॒रा अथो॑ क्षु॒द्राः । अथो॑ कृ॒ष्णा अथो॑ श्वे॒ताः ।

अथो॑ आ॒शा॒ति॒का ह॒ताः । श्वे॒ताभिः॑ स॒ह

स॒र्वे ह॒ताः । 77 (10) (A36)

अनुवाकं-37

T.A.7.37.1

आ॒ह॒राव॑द्य । शृ॒तस्य॑ ह॒विषो॑ यथा॑ । तथ् स॒त्यम् । यद॒मुं य॑मस्य॑

ज॒म्भयोः॑ । आ॒द॒धामि॑ त॒था हि॑ तत् । खण्फ॑ण्म॒सि । 78 (6) (A37)

अनुवाकं-38

T.A.7.38.1

ब्र॒ह्म॒णा॒ त्वा॒ श॒पामि॑ । ब्र॒ह्म॒णस्त्वा॒ श॒प॒थे॒न॑ श॒पामि॑ । घो॒रेण॑ त्वा
भृ॒गूणाञ्च॑क्षु॒षा प्रेक्षे॑ ॥ रौ॒द्रेण॑ त्वाङ्गि॒रसाम्॑ मन॒सा ध्या॑यामि ।
अ॒घस्य॑ त्वा धा॒रया॑ वि॒द्ध्यामि॑ ।
अ॒धरो॑ मत् प॒द्यस्वा॒सौ । 79 (6) (A38)

अनुवाकं-39

T.A.7.39.1

उ॒त्तु॒द शि॒मिजा॑वरि । त॒ल्पे॒जे त॒ल्प उ॒त्तु॒द । गि॒रीꣳ र॒नु प्र॑वेशय ।
म॒रीची॑रुप॒ सन्नु॑द । या॒व॒दि॒तः पु॒रस्ता॑दु॒दया॑ति॒ सूर्यः॑ ।
ता॒व॒दि॒तोऽमु॑न्नाशय । योऽस्मा॑न् द्वेष्टि ।
यञ्च॑ व॒यम् द्वि॒ष्मः । 80 (8) (A39)

अनुवाकं-40

T.A.7.40.1

भूर्भु॒वस्सु॒वो भूर्भु॒वस्सु॒वो भूर्भु॒वस्सु॒वः । भुवो॑ऽद्वायि॒ भुवो॑ऽद्वायि॒
भुवो॑ऽद्वायि॒ । नृ॒म्णा॒यि नृ॒म्णम् नृ॒म्णा॒यि नृ॒म्णम् नृ॒म्णा॒यि नृ॒म्णम् ।
नि॒धा य्यो॑ऽवायि॒ नि॒धा य्यो॑ऽवायि॒ नि॒धा य्यो॑ऽवायि॒ । ए अ॒स्मे अ॒स्मे ।

सुव॑र्न ज्योतीः॑ । 81 (6) (A40)

अनुवाकं-41

T.A.7.41.1

पृ॒थि॒वी॒ स॒मि॒त् । ताम॑ग्निः॒ स॒मि॒न्धे । साऽग्नि॑ꣳ स॒मि॒न्धे । ताम॑हꣳ
स॒मि॒न्धे । सा॒ मा॒ स॒मि॒द्धा । आयु॑षा तेज॒सा । वर्च॑सा श्रि॒या ।
यश॑सा ब्र॒ह्मव॑र्चसेन । अ॒न्नाद्ये॑न स॒मि॒न्ताꣳ स्वाहा॑ ॥

अ॒न्तरि॑क्षꣳ स॒मि॒त् । 82 (10)

T.A.7.41.2

तां वा॑युः स॒मि॒न्धे । सा वा॑युꣳ स॒मि॒न्धे । ताम॑हꣳ स॒मि॒न्धे ।
सा॒ मा॒ स॒मि॒द्धा । आयु॑षा तेज॒सा । वर्च॑सा श्रि॒या ।
यश॑सा ब्र॒ह्मव॑र्चसेन । अ॒न्नाद्ये॑न स॒मि॒न्ताꣳ स्वाहा॑ ॥ द्यौः स॒मि॒त् ।
तामा॑दित्यः स॒मि॒न्धे । 83 (10)

T.A.7.41.3

साऽऽदि॑त्यꣳ स॒मि॒न्धे । ताम॑हꣳ स॒मि॒न्धे । सा॒ मा॒ स॒मि॒द्धा ।
आयु॑षा तेज॒सा । वर्च॑सा श्रि॒या । यश॑सा ब्र॒ह्मव॑र्चसेन ।
अ॒न्नाद्ये॑न स॒मि॒न्ताꣳ स्वाहा॑ ॥ प्रा॒जाप॑त्या मे स॒मि॒दसि॑ स॒प॒न्नक्ष॑यणी ।

भ्रा॒तृ॒व्य॒हा मे॑ऽसि॒ स्वा॒हा॑ । अ॒ग्ने॑ व्रत॒पते॑ व्रत॒ञ्च॑रिष्यामि । 84 (10)

T.A.7.41.4

तच्छ॑केयं॒ तन्मे॑ रा॒द्ध्य॒ताम् । वा॒यो व्रत॒पत॑ आ॒दित्य॑ व्रत॒पते॑ । व्र॒ता॒नां॑
 व्र॒त॒पते॑ व्रत॒ञ्च॑रिष्यामि । तच्छ॑केयं॒ तन्मे॑ रा॒द्ध्य॒ताम् । द्यौः॑ स॒मित् ।
 ता॒मा॒दि॒त्यः स॒मिन्धे॑ । साऽऽदि॒त्य॑ स॒मिन्धे॑ । ता॒म॒ह॑ स॒मिन्धे॑ ।
 सा॒ मा स॒मिद्धा॑ । आ॒यु॒षा ते॒ज॒सा । 85 (10)

T.A.7.41.5

वर्च॑सा श्रि॒या । यश॑सा ब्र॒ह्म॒वर्च॑सेन । अ॒न्नाद्ये॑न स॒मिन्ता॑ स्वा॒हा॑ ।
 अ॒न्त॒रि॒क्ष॑ स॒मित् । तां वा॒युः स॒मिन्धे॑ । सा वा॒यु॑ स॒मिन्धे॑ ।
 ता॒म॒ह॑ स॒मिन्धे॑ । सा॒ मा स॒मिद्धा॑ । आ॒यु॒षा ते॒ज॒सा ।
 वर्च॑सा श्रि॒या । 86 (10)

T.A.7.41.6

यश॑सा ब्र॒ह्म॒वर्च॑सेन । अ॒न्नाद्ये॑न स॒मिन्ता॑ स्वा॒हा॑ । पृ॒थि॒वी स॒मित् ।
 ता॒म॒ग्निः स॒मिन्धे॑ । साऽग्नि॑ स॒मिन्धे॑ । ता॒म॒ह॑ स॒मिन्धे॑ ।
 सा॒ मा स॒मिद्धा॑ । आ॒यु॒षा ते॒ज॒सा । वर्च॑सा श्रि॒या ।
 यश॑सा ब्र॒ह्म॒वर्च॑सेन () । 87 (10)

T.A.7.41.7

अ॒न्नाद्ये॑न॒ समि॑न्ता॒ स्वाहा॑ । प्रा॒जाप॑त्या मे॒ समि॑दसि सप॒न्नक्ष॑यणी ।
 भ्रातृ॑व्यहा मे॒ऽसि स्वाहा॑ । आ॒दित्य॑ व्रतप॒ते व्रत॑मचारिषम् । तद॑शकं
 तन्मे॑ऽराधि । वा॒यो व्रत॑पते॒ऽग्ने व्रत॑पते । व्र॒तानां॑ व्रत॑पते व्रत॑मचारिषम् ।
 तद॑शकं तन्मे॑ऽराधि । 88 (8)

(स॒मि॒त् - स॒मि॒न्धे - व्र॒तञ्च॑रिष्या - म्या॒युषा॑ तेज॒सा - वर्च॑सा
 श्रि॒या - यश॑सा ब्रह्मवर्च॑सेना - +ष्टौ च) (A41)

अनुवाक-42

T.A.7.42.1

श॒न्नो वा॑तः पव॒ताम् मा॑तरिश्वा श॒न्नस्त॑पतु सूर्यः । अ॒हानि॑ शम्
 भव॑न्तु नः श॒न् रा॒त्रिः प्र॑तिधीयताम् । श॒मुषा॑ नो व्यु॒च्छतु॑
 श॒मादि॑त्य उदे॒तु नः॑ । शि॒वा नः॑ श॒न्तमा॑ भव सु॒मृडी॑का सर॒स्वति॑ ।
 मा ते॒ व्यो॑म स॒न्दृशि॑ । इ॒डा॒यै वा॑स्त्वसि वास्तु॒मद् वास्तु॑मन्तो
 भूया॑स्म मा वास्तो॒-श्छि॑त्स्मह्य वास्तुः स भूयाद्-यो॒ऽस्मान् द्वेष्टि॑
 यञ्च॑ व॒यं द्वि॑ष्मः । प्र॒तिष्ठा॑सि प्र॒तिष्ठा॑वन्तो भूया॑स्म मा प्र॒तिष्ठा॑या-

श्छि॑त्स्म॒ह्य॒ प्रति॑ष्ठः॒ स॒ भू॒याद् यो॑ऽस्मान् द्वेष्टि॑ यञ्च॑ व॒यं द्वि॑ष्मः ।

आ॒ वा॒त॒ वा॒हि भेष॑जम् वि॒ वा॒त॒ वा॒हि यद्र॑पः ।

त्व॑ हि वि॒श्वभेष॑जो दे॒वानां॑ दू॒त ई॒यसे॑ । द्वावि॑मौ वा॒तौ वा॒त॒

आ॒ सि॒न्धो॒रा॒ प॒रा॒व॒तः । 89 (10)

T.A.7.42.2

दक्ष॑म् मे॒ अ॒न्य आ॒वा॒तु॒ प॒रा॒ऽन्यो॑ वा॒तु॒ यद्-र॑पः । यद॑दो वा॒त ते॑

गृ॒हेऽमृत॑स्य नि॒धिर्हि॒तः । ततो॑ नो दे॒हि जी॒वसे॑ ततो॑ नो धे॒हि

भेष॑जम् । ततो॑ नो मह॑ आ॒व॒ह वा॒त आ॒वा॒तु॒ भेष॑जम् ।

श॒म्भूर् म॒योभू॑र्नो ह॒दे प्र॒ ण॒ आयू॑षि ता॒रिष॑त् । इन्द्र॑स्य गृ॒होऽसि॑

तम् त्वा॑ प्र॒पद्ये॑ स॒गु॒स्साश्चः॑ । सह॑ यन्मे॒ अ॒स्ति ते॒न । भूः प्र॒पद्ये॑

भुवः॑ प्र॒पद्ये॑ सु॒वः प्र॒पद्ये॑ भूर्भु॒वस्सु॒वः प्र॒पद्ये॑ वा॒युम् प्र॒पद्ये॑ऽना॒र्ताम्

दे॒वता॑म् प्र॒पद्ये॑ ऽश्मा॒नमा॒खण॑म् प्र॒पद्ये॑ प्र॒जाप॑तेर् ब्र॒ह्मको॒शम् ब्र॒ह्म

प्र॒पद्य॑ ओम् प्र॒पद्ये॑ । अ॒न्तरि॑क्षम् म॒ उ॒र्वन्त॑रम् बृ॒हद॑ग्नयः प॒र्वता॑श्च

यया॑ वा॒तः स्व॒स्त्या स्व॒स्तिमा॑न्तया॒ स्व॒स्त्या स्व॒स्ति मा॑नसानि ।

प्रा॒णापा॑नौ मृ॒त्योर्मा॑ पा॒तम् प्रा॒णापा॑नौ मा॒ मा॒ हा॒सिष्ट॑म् मयि॑ मे॒धाम्

मयि॑ प्र॒जाम् मय्य॑ग्नि स्तेजो॑ दधातु मयि॑ मे॒धाम् मयि॑ प्र॒जाम्
मयीन्द्र॑ इन्द्रि॒यम् दधातु॑ मयि॑ मे॒धाम् मयि॑ प्र॒जाम् मयि॑ सूर्यो॑
भ्राजो॑ दधातु । 90 (10)

T.A.7.42.3

द्यु॒भिर॒क्तुभिः॑ परि॒पात॑-म॒स्मान॑रि॒ष्टेभि॑-रश्चि॒ना सौ॑भ॒गोभिः॑ । तन्नो॑ मि॒त्रो
वरु॑णो मा॒मह॑न्ता म॒दितिः॑ सि॒न्धुः पृ॒थिवी॑ उ॒त द्यौः॑ । कया॑ नश्चि॒त्र
आ॒भुव॑दू॒ती स॒दावृ॑धः सखा॑ । कया॑ श॒चिष्ठ॑या वृ॒ता । कस्त्वा॑ स॒त्यो
म॒दाना॑म् म॒हिष्ठो॑ मथ्स॒दन्ध॑सः । दृ॒ढा चि॑दा॒रुजे॑ वसु॑ । अ॒भी षु॑ णः
स॒खीना॑मवि॒ता ज॑रि॒तृणा॑म् । श॒तम् भ॑वा॒स्यूति॑भिः । वयः॑ सु॒पर्णा
उ॒पसे॑दु॒रिन्द्र॑म् प्रि॒यमे॑धा ऋ॒षयो॑ ना॒धमा॑नाः । अप॑ ध्वा॒न्तमूर्णु॑हि पू॒र्धि
चक्षु॑र् मु॒मुग्ध्य॑स्मा-न्नि॒धये॑व ब॒द्धान् । 91 (10)

T.A.7.42.4

शन्नो॑ दे॒वीर॑भि॒ष्टय॑ आपो॑ भवन्तु पी॒तये॑ । शं यो॑रभि॒स्रव॑न्तु नः ।
ई॒शाना॑ वा॒र्याणा॑म् क्षय॑न्तीश्च॒र्षणी॑नाम् । अपो॑ या॒चामि॑ भेष॒जम् ।
सु॒मित्रा॑ न आप॑ ओष॒धयः॑ सन्तु दु॒र्मित्रा॑स्तस्मै॑ भूया॒सुर्-योऽस्मान्-॑

द्वेष्टि॑ यञ्च॑ वयं॑ द्विष्मः॑ । आपो॑ हि॒ ष्ठा मयो॑भुवस्ता॑ न ऊ॒र्जे दधा॑तन ।
महे॑ रणाय॑ चक्ष॑से । यो वः॑ शिव॑तमो रस॑स्तस्य॑ भाज॑यते॒ह नः॑ ।
उ॒शती॑रिव॒ मातरः॑ । तस्मा॑ अर॑म् गमा॑म वो॒ यस्य॑
क्षया॑य जिन्व॑थ । 92 (10)

T.A.7.42.5

आपो॑ जन॑यथा च नः॑ । पृथि॑वी शान्ता॑ साऽग्नि॑ना शान्ता॑ सा मे॑
शान्ता॑ शुच॑श्च॑ शम॑यतु । अन्त॑रिक्ष॑श्च॑ शान्तं॑ तद् वा॒युना॑ शान्तं॑
तन्मे॑ शान्त॑श्च॑ शुच॑श्च॑ शम॑यतु । द्यौः॑ शान्ता॑ साऽऽदि॑त्येन॑ शान्ता॑
सा मे॑ शान्ता॑ शुच॑श्च॑ शम॑यतु । पृथि॑वी शान्ति॑रन्त॑रिक्ष॑श्च॑
शान्ति॑र् द्यौः॑ शान्ति॑र् दि॒शः शान्ति॑ रवा॒न्तर॑दि॒शाः शान्ति॑ र॒ग्निः
शान्ति॑र् वा॒युः शान्ति॑ र॒दि॒त्यः शान्ति॑ श्र॒न्द्र॒माः शान्ति॑र् नक्ष॑त्राणि
शान्ति॑ र॒ापः शान्ति॑ रौष॑धयः॑ शान्ति॑र् वन॑स्पतयः॑ शान्ति॑र् गौः॑ शान्ति॑
र॒जा शान्ति॑ र॒श्वः शान्ति॑ः पु॒रुषः॑ शान्ति॑र् ब्र॒ह्म शान्ति॑र् ब्रा॒ह्मणः॑
शान्ति॑ः शान्ति॑रे॒व शान्ति॑ः शान्ति॑र्मे अस्तु॑ शान्ति॑ः । तया॑ऽह॑श्च॑ शान्त्या॑
सर्व॑शान्त्या॑ मह्यं॑ द्वि॒पदे॑ चतु॒ष्पदे॑ च शान्ति॑म् करो॑मि शान्ति॑र्मे अस्तु॑

शान्तिः । ए॒ह श्री॒श्च ही॒श्च धृ॒तिश्च॒ तपो॒ मे॒धा प्र॒तिष्ठा॒ श्रद्धा॒ सत्यं॑
 धर्म॑श्चै॒तानि॒ मो॒त्तिष्ठ॑न्त-मनू॑त्तिष्ठन्तु॒ मा मा॑ ७ श्री॒श्च ही॒श्च धृ॒तिश्च॒ तपो॒
 मे॒धा प्र॒तिष्ठा॒ श्रद्धा॒ सत्यं॑ धर्म॑श्चै॒तानि॒ मा मा॑ हा॒सिषुः॑ ।
 उ॒दायु॑षा स्वा॒युषो॑दोष॒धीना॑ ७ र॒सेनो॑त् पर्जन्य॑स्य शु॒ष्मे णो॑दस्था-
 म॒मृता॑ ७ अ॒नु । तच्च॑क्षुर् दे॒वहि॑तम् पु॒रस्ता॑ ॥ च्छु॒क्रमु॑च्चरत् । पश्ये॑म
 शर॑दः श॒तम् जी॒वेम॑ शर॑दः श॒तम् न॑न्दाम शर॑दः श॒तम् मो॑दाम
 शर॑दः श॒तम् भ॒वाम॑ शर॑दः श॒तम् शृ॑ण्वाम शर॑दः श॒तम् प्र॑ब्रवाम
 शर॑दः श॒त म॒जीताः॑ स्याम शर॑दः श॒तम् ज्यो॑क्च
 सूर्य॑म् दृ॒शे () । 93 (10)

T.A.7.42.6

य उ॒दगान्॑ मह॒तोऽर्ण॑वाद्-वि॒भ्राज॑मानः सरि॒रस्य॑ म॒ध्याथ्स॑ मा वृष॒भो
 लो॒हिता॑क्षः सूर्यो॑ वि॒पश्चिन् मन॑सा पु॒नातु॑ । ब्र॒ह्मणः॑ श्रो॒तन्य॑सि ब्र॒ह्मण॑
 आ॒णी स्थो॑ ब्र॒ह्मण॑ आ॒वप॑नमसि धा॒रिते॑यम् पृ॒थिवी॑ ब्र॒ह्मणा॑ म॒ही
 धा॒रित॑मे॒नेन॑ म॒हद॑न्तरि॒क्षम् दि॒वम् दा॑धार पृ॒थिवी॑ ७ स॒देवां य॑द॒हं वे॑द

तदहं॑ धा॒रया॑णि मा म॒द्वेदोऽधि॑ वि॒स्रस॑त् । मे॒धा॒मनी॑षे माऽऽवि॑शता॒
समी॑ची भू॒तस्य॑ भव्यस्याव॑रु॒ध्यै॑ सर्व॑मायुरयाणि॒ सर्व॑मायुरयाणि ।
आ॒भिर् गी॒र्भिर् यदतो॑ न ऊ॒नमा॑प्यायय हरि॒वो वर्ध॑मानः ।
यदा॑ स्तोतृ॒भ्यो महि॑ गो॒त्रा रु॒जासि॑ भूयिष्ठभाजो॒ अध॑ ते स्याम ।
ब्र॒ह्म प्रा॒वादि॑ष्म तन्नो॒ मा हा॑सीत् ।
ओम् शान्तिः॑ शान्तिः॑ शान्तिः॑ । 94 (7)

(परा॑वतो॒-दधा॑तु-ब॒द्धान्-जिन्व॑थ-दृ॒शे-+सप्त॑ च) (A42)

Prapaataka Korvai with starting Padams of 1 to 42 Anuvaakams :-

(नमो॑ – यु॒ञ्जते॑ – वृ॒ष्णो अ॑श्वस्य – ब्र॒ह्मन् प्र॑वर्ग्येण – ब्र॒ह्मन्
प्र॒चरि॑ष्यामो – द॒श प्रा॑ची – रप॒श्यङ्गो॑पामम् – दे॒वस्य॑ –
समु॒द्रा – ये॒षे पी॑पिहि – घ॒र्म या॑ ते – म॒हीना॑म् च॒त्वा – र्य॑स्कान्.
– या पु॒रस्ता॑थ् सप्त सप्त – प्रा॒णाय॑ त्रीणि – पू॒ष्णो च॒त्वायु॑र् –
द॒स्यैका॑दश – यास्ते॑ स॒प्ता – ग्नि॑र् द॒ध्रुव॑सीः दै॒कान्न॑ वि॒ंशति॑र् –
भूरू॒र्ध्व त्रि॑ंशतद् – भूर् मयि॑ षोड॒श – यास्ते॑ घो॒रा नव॑ –

सप्तमः प्रपाठकः – (TA 7)

स्निक्चाष्टौ – धुनिश्च द्वे – उग्रश्च त्रीणि – होरात्रे पञ्च – खट्
त्रीणि – विगाः सप्तदशा – सृन् मुखः चत्वारि – यदेतद् वृक्सः
पञ्च – यदीषितश्चत्वारि – दीर्घमुखि त्रीणि – तथा चत्वारि –
यदेतद् भूतानि षट् – प्रसार्य त्रीण्य – त्रीणा दशा – हरावद्य –
ब्रह्मणा षट्थं षड् – उत्तुदाष्टौ – भूः षट् – पृथिव्यष्ट षष्टिः –
शन्नः सप्तपञ्चाशद् द्विचत्वारिंशत्)

Korvai with starting Padams of 1, 11, 21 Series of Dasinis :-

(नमो वाचे – ब्रह्मन् प्रवर्ग्येण – मयि रु – गन्तरिक्षेण – पिता
नोऽसि – महीना – मुप नो – यदेतद् – भूर् – द्यूभिश्चतुर्
नवतिः)

। हरिः ओम् ।

कृष्ण यजुर्वेदीय तैत्तिरीय ब्राह्मणे आरण्यके

सप्तमः प्रपाठकः समाप्तः

Appendix (of expansions)

T.A.7.11.2 – अनु॑नोऽद्या॑नुमतिः{1} , अन्वि॑दनुमते॑ त्वम् {2}

अनु॑ नोऽद्या॑नुमतिर्य॑ज्ञं दे॒वेषु॑ मन्यतां ।

अ॒ग्निश्च॑ ह॒व्यवा॑हनो भवतां दाशुषे॑ मयः ॥ {1}

अन्वि॑दनुमते॑ त्वं म॒न्यासै॑ शञ्चनः कृधि ।

क्र॒त्वे द॑क्षाय नो हि॒नु प्र॑ण आयू॑षि तारिषः ॥ {2}

(Both {1} and {2} appearing in TS 3.3.11.3 and 3.3.11.4)

T.A.7.11.9 – उद्व॑यन्तम॑सस्परि॑ {3} , उदु॑त्यं चि॒त्रम् {4}

उद्व॑यं तम॑सस्परि॑ पश्यन्तो ज्योति॑रुत्तरं ।

दे॒वं दे॒वत्रा॑ सूर्य॑मगन्म ज्योति॑रुत्तमं ॥ {3}

{3} appearing in T.S.4.1.7.4)

उदु॑ त्यं जा॒तवे॑दसं दे॒वं व॑हन्ति के॒तवः॑ । दृ॒शे वि॑श्वाय॒ सूर्य॑ ॥

चि॒त्रं दे॒वाना॑-मु॒दगा॑दनी॒कं चक्षु॑ मि॒त्रस्य॑ वरु॒णस्या॑ग्नेः ॥ {4}

{4} appearing in T.S.1.4.43.1)

T.A.7.20.2 – पुनरूर्जा{5}, सह रय्या {6}

पुन॑रूर्जा॑ नि॒ वर्त॑स्व पुन॑रग्न॒ इ॒षाऽऽयु॑षा । पुन॑र्नः पाहि॒ विश्व॑तः ॥ {5}

सह॑ रय्या॑ नि॒ वर्त॑स्वाग्ने॒ पिन्व॑स्व धार॑या ।

वि॒श्व॒फ॒स्नि॒या वि॒श्व॒त॒स्प॒रि ॥ {6}

(Both {5} and {6} appearing in T.S.1.5.3.3)

T.A.7.20.3 – इमम् मे वरुण{7}, तत्त्वा यामि{8}

इ॒मं मे॑ वरु॒ण श्रु॑धी हव॒म॒द्या च॑ मृडय ।

त्वा॒म॒व॒स्यु॒रा च॑के ॥ {7}

तत्त्वा॑ यामि॒ ब्र॒ह्म॒णा व॒न्द॒मा॒न-स्त॒दा शा॑स्ते॒ यज॑मानो ह॒विर्भिः॑ ।

अ॒हे॒ड॒मा॒नो वरु॑णे॒ह बो॒ध्यु॒रु॒श॒स मा॑ न आयुः प्रमो॑षीः ॥ {8}

(Both {7} and {8} appearing in T.S.2.1.11.6)

T.A.7.20.3 – त्वन्नो अग्ने{9}, स त्वन्नो अग्ने{10}

त्वं नो॑ अग्ने॒ वरु॑णस्य वि॒द्वान् दे॒वस्य॑ हे॒डोऽव॑ यासि सी॒ष्टाः ।

यजि॑ष्ठो वह्नि॑ तमः॑ शो॑शु॒चानो॑ वि॒श्वा द्वे॑षा॒सि प्र॑मु॒मुग्ध्य॑स्मत् ॥ {9}

स त्व॑नो अ॒ग्नेऽव॑मो भवो॑ती नेदि॑ष्ठो अ॒स्या उ॒षसो॑ व्यु॒ष्टौ ।

अव॑ यक्ष्व नो वरु॑ण॒ ररा॑णो वी॒हि मृ॑डीक॒ सु॒हवो॑ न ए॒धि ॥ {10}

(Both {9} and {10} appearing in T.S.2.5.12.3)

T.A.7.20.3 – त्वम॑ग्ने अया॑सि{11}

त्वम॑ग्ने अया॑सि । अया॑ सन्मनसा हितः । अया॑ सन् ह॒व्यमू॑हिषे ।

अया॑ नो धे॒हि भेष॑जम् । इ॒ष्टो अ॒ग्निरा॑हुतः । स्वाहा॑कृतः पिप॑र्तु नः ।

स्वगा॑ दे॒वेभ्य॑ इ॒दं नमः॑ ॥ {11}

({11} appearing in T.B.2.4.1.9)

T.A.7.20.3 – उ॒द्वय॑न्तम॒सस्प॑रि {12} , उ॒दुत्यं॑{13}, चि॒त्रम् {14}

{12}, {13} and {14} is same as {3} and {4} above

T.A.7.20.3 – वयः॑ सु॒पर्णाः {15}

वयः॑ सु॒पर्णा उप॑सेदु॒रिन्द्र॑म् । प्रि॒यमे॑धा ऋ॒षयो॑ नाध॑मानाः ।

अप॑ ध्वा॒न्तमू॑र्ण॒हि पू॒र्धि चक्षुः॑ । मु॒मुग्ध्य॑स्मान् नि॒धये॑व ब॒द्धान् ॥ {15}

{15} appearing in T.B.2.5.8.3)

Details of Dasini&Vaakyams for – Prapaatakam7 – TA 7

	Dasini	Vaakyams
Anuvakam 1	1	4
Anuvakam 2	6	59
Anuvakam 3	3	36
Anuvakam 4	1	12
Anuvakam 5	7	71
Anuvakam 6	3	29
Anuvakam 7	5	52
Anuvakam 8	5	49
Anuvakam 9	4	38
Anuvakam 10	6	57
Anuvakam 11	9	88
Anuvakam 12	1	4
Anuvakam 13	1	7
Anuvakam 14	1	7
Anuvakam 15	1	3
Anuvakam 16	1	4
Anuvakam 17	1	11
Anuvakam 18	1	7
Anuvakam 19	1	19
Anuvakam 20	3	30

तैत्तिरीय आरण्यकं – (TA 7)

Anuvakam 21	1	16
Anuvakam 22	1	9
Anuvakam 23	1	8
Anuvakam 24	1	2
Anuvakam 25	1	3
Anuvakam 26	1	5
Anuvakam 27	1	3
Anuvakam 28	1	17
Anuvakam 29	1	4
Anuvakam 30	1	5
Anuvakam 31	1	4
Anuvakam 32	1	3
Anuvakam 33	1	4
Anuvakam 34	1	6
Anuvakam 35	1	3
Anuvakam 36	1	10
Anuvakam 37	1	6
Anuvakam 38	1	6
Anuvakam 39	1	8
Anuvakam 40	1	6
Anuvakam 41	7	68
Anuvakam 42	6	57
Total →	94	840

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

8 कृष्ण यजुर्वेदीय तैत्तिरीय आरण्यके अष्टमः प्रपाठकः

8.1 अष्टमः प्रपाठकः

अनुवाकम् – 1

T.A.8.1.1

दे॒वा वै स॒त्रमा॑सत । ऋ॒द्धि॒परि॑मितम् य॑श॒स्का॒माः । ते॒ऽब्रु॑वन् ।
य॒न्नः प्र॑थ॒मं य॑श॒ ऋ॒च्छा॑त् । सर्वे॑षा-न्न॒स्तथ॑-स॒हास॑दिति ।
तेषा॑म् कुरु॒क्षेत्रं॑ वे॒दि॒रासी॑त् । तस्यै॑ खाण्ड॒वो दक्षि॑णार्द्ध आसीत् ।
तू॒र्ध्नमु॑त्तरार्द्धः । प॒री॒णज्ज॑घनार्द्धः । म॒रु॒व उत्क॑रः । 1 (10)

T.A.8.1.2

तेषा॑म् म॒खं वै॒ष्ण॒वं य॑श॒ आ॒र्च्छ॑त् । त॒न्य॒का॒म॒य॒त । तेना॑पा॒क्राम॑त् ।
तम् दे॒वा अ॒न्वा॒यन् । यशो॑ऽव॒रु॒रु॒थ्स॒मा॒नाः । तस्या॑न्वा॒गत॑स्य ।
स॒व्या॒द्ध॒नुर॑जायत । दक्षि॑णादिष॒वः । तस्मा॑दिषु॒धन्व॑म् पु॒ण्य॑जन्म ।
य॒ज्ञज॑न्मा हि । 2 (10)

T.A.8.1.3

तमे॑क॒ स॒न्तम् । ब॒हवो॑ नाभ्य॑धृ॒ष्णुवन् । तस्मा॑दे॒कमि॑षु॒धन्वि॑नम् ।
 ब॒हवो॑ऽनि॒षुध॑न्वा नाभि॑धृ॒ष्णुवन्ति । सोऽस्म॑यत । ए॒कम् मा स॒न्तम्
 ब॒हवो॑ नाभ्य॑धर्षि॒षुरिति॑ । तस्य॑ सि॒ष्मिया॑णस्य तेजो॑ऽपा॒क्राम॑त् ।
 तद्-दे॒वा ओष॑धीषु॒ न्यमृ॑जुः । ते श्या॑माका॒ अभ॑वन् ।

स्मया॑का वै नामै॒ते । 3 (10)

T.A.8.1.4

तथ् स्मया॑काना॒ स्मया॑क॒त्वम् । तस्मा॑द्-दी॒क्षिते॑नापि॒गृह्य॑ स्मे॒तव्य॑म् ।
 तेज॑सो धृ॒त्यै । स ध॑नुः प्र॒तिष्क॑भ्याति॒ष्ठत् । ता उप॑दी॒का अब्रु॑वन्-
 वर॑म् वृ॒णाम॑है । अथ॑ व इ॒मं र॑न्ध॒याम॑ । यत्र॑ क्व च॒ खना॑म ।
 तदपो॑ऽभितृ॒णदा॑मेति । तस्मा॑दुप॒दीका॒ यत्र॑ क्व च॒ खन॑न्ति ।
 तदपो॑ऽभितृ॒न्दन्ति॑ । 4 (10)

T.A.8.1.5

वारे॑वृ॒त ह्या॑साम् । तस्य॑ ज्याम॒प्याद॑न् । तस्य॑ ध॒नुर्वि॑प्रव॒माणं
 शिर॑ उदव॒र्तय॑त् । तद् द्या॒वापृ॑थि॒वी अनु॑प्राव॒र्तत॑ । यत् प्रा॒वर्त॑त ।
 तत् प्र॒वर्ग्य॑स्य प्र॒वर्ग्य॑त्वम् । यद्घ्राँ(४) इत्य॑प॒तत् ।

तद्धर्मस्य घर्मत्वम् । महतो वीर्यमपप्तदिति ।

तन् महावीरस्य महावीरत्वम् । 5 (10)

T.A.8.1.6

यदस्याः समभरन् । तथ् सम्राज्ञः सम्राट्त्वम् । तञ् स्तुतम्
देवतास्त्रेधा व्यगृह्णत । अग्निः प्रातस्सवनम् । इन्द्रो माद्ध्यन्दिनञ्
सवनम् । विश्वे देवास्तृतीयसवनम् । तेनापशीर्ष्णा यज्ञेन यजमानाः ।
नाशिषोऽवारुन्धत । न सुवर्गं लोकमभ्यजयन् ।

ते देवा अश्विनावब्रुवन् । 6 (10)

T.A.8.1.7

भिषजौ वै स्थः । इदं यज्ञस्य शिरः प्रतिधत्तमिति । तावब्रूतां वरम्
वृणावहै । ग्रह एव नावत्रापि गृह्यतामिति । ताभ्या-मेतमाश्विन-
मगृह्णन् । तावेतद्-यज्ञस्य शिरः प्रत्यधत्ताम् । यत् प्रवर्ग्यः ।
तेन सशीर्ष्णा यज्ञेन यजमानाः । अवाशिषोऽरुन्धत । अभि सुवर्गं
लोकमजयन् () । यत् प्रवर्ग्यम् प्रवृणक्ति । यज्ञस्यैव तच्छिरः
प्रतिदधाति । तेन सशीर्ष्णा यज्ञेन यजमानः । अवाशिषो रुन्धे ।

अ॒भि सु॒वर्गं॑ लो॒कम् ज॑यति । तस्मा॑देष आ॒श्विन॑प्रवया इव ।

यत् प्र॑वर्ग्यः । 7 (17)

(उत्क॑रो – ह्ये॑ – ते – तृ॑न्दन्ति – महा॑वीरत्व – म॑ब्रुवन् –

न॑जयन्थ॒ सप्त॑ च) (A1)

अनुवाकम् – 2

T.A.8.2.1

सा॒वि॒त्रम् जु॑होति प्र॒सू॒त्यै॑ । चतु॑र्गृहीतेन जुहोति । चतु॑ष्पादः
प॒शवः॑ । प॒शूने॑वावरुन्धे । चत॑स्रो दि॒शः । दि॒क्ष्वे॑व प्र॒ति॒ति॒ष्ठति॑ ।
छन्दा॑सि दे॒वेभ्यो॑ऽपा॒क्राम॑न् । न वो॑ऽभा॒गानि॑ ह॒व्यं व॑क्ष्याम इति ।
तेभ्य॑ एत॒च्चतु॑र्गृहीत॒म॒धार॑यन् । पु॒रो॒नु॒वा॒क्यायै॑ या॒ज्यायै॑ । 8 (10)

T.A.8.2.2

दे॒वता॑यै वषट्काराय । यच्चतु॑र्गृहीतम् जुहोति । छन्दा॑स्ये॒व तत्
प्री॑णाति । तान्य॑स्य प्री॒तानि॑ दे॒वेभ्यो॑ ह॒व्यं व॑हन्ति । ब्र॒ह्म॒वादि॑नो
वद॑न्ति । हो॒तव्य॑म् दी॒क्षित॑स्य गृहा(३) इ न हो॒तव्या॑(३) मिति ।
ह॒विर्वै दी॑क्षितः । यज्जु॑हुयात् । ह॒विष्कृतं॑ य॒ज॒मा॒नम॒ग्नौ प्र॑दद्ध्यात् ।

यन्न जुहुयात् । 9 (10)

T.A.8.2.3

य॒ज्ञप॒रुरन्त॑रियात् । य॒जुरे॒व व॑देत् । न ह॒विष्कृ॑तं य॒जमा॑नम॒ग्नौ
प्र॒दधा॑ति । न य॒ज्ञप॒रुरन्त॑रेति । गा॒यत्री॑ छन्दा॒स्यत्य॑मन्यत ।
तस्यै॑ वषट्कारो॑ऽभ्यय्य शिरो॑ऽच्छिनत् । तस्यै॑ द्वेधा॒ रसः॑ प॒राऽप॑तत् ।
पृ॒थि॒वीम॑र्द्धः प्रा॒विश॑त् । प॒शून्म॑र्द्धः । यः पृ॒थि॒वीम् प्रा॒विश॑त् । 10 (10)

T.A.8.2.4

स ख॒दिरो॑ऽभवत् । यः प॒शून् । सोऽजा॑म् । यत्खा॑दिर्य॒भिर् भ॑वति ।
छन्दा॑सामे॒व रसे॑न य॒ज्ञस्य॑ शि॒रः सम्भ॑रति । यदौदु॑म्बरी ।
ऊ॒र्वा उ॒दुम्ब॑रः । ऊ॒र्जे॒व य॒ज्ञस्य॑ शि॒रः सम्भ॑रति ।
यद्-वै॒णवी॑ । ते॒जो वै वे॑णुः । 11 (10)

T.A.8.2.5

ते॒जसै॒व य॒ज्ञस्य॑ शि॒रः सम्भ॑रति । यद्-वै॒कङ्क॑ती । भा ए॒वाव॑रुन्धे ।
दे॒वस्य॑ त्वा स॒वितुः॑ प्र॒सव॑ इत्य॒भिमा॑दत्ते प्र॒सूत्यै॑ ।
अ॒श्विनो॑र्-बाहु॒भ्यामि॑त्याह । अ॒श्विनौ॑ हि दे॒वाना॑म॒ध्वर्यू॑ आस्ता॒म् ।
पू॒ष्णो ह॒स्ता॒भ्यामि॑त्याह य॒त्यै । व॒ज्र इ॒व वा ए॒षा । यद॑भिः ।

अ॒भ्रि॒रसि॑ ना॒रि॒रसी॑त्याह॒ शान्त्यै॑ ॥ 12 (10)

T.A.8.2.6

अ॒ध्व॒रकृ॑द्-दे॒वेभ्य॑ इत्याह । य॒ज्ञो वा॑ अ॒ध्व॒रः । य॒ज्ञकृ॑द्-दे॒वेभ्य॑
इति॑ वावै॒तदा॑ह । उ॒त्तिष्ठ॑ ब्र॒ह्म॒णस्प॑त इत्याह । ब्र॒ह्म॒णैव॑ य॒ज्ञस्य॑
शि॒रोऽच्छै॑ति । प्रै॒तु ब्र॒ह्म॒णस्प॑तिरि॒त्याह॑ । प्रै॒त्यैव॑ य॒ज्ञस्य॑ शि॒रोऽच्छै॑ति ।
प्र॒ दे॒व्यैतु॑ सू॒नृते॑त्याह । य॒ज्ञो वै सू॒नृता॑ ॥

अ॒च्छा वी॒रन्न॑र्यम् प॒ङ्क्ति॑राध॒समि॑त्याह ॥ 13 (10)

T.A.8.2.7

पा॒ङ्क्तो हि॑ य॒ज्ञः । दे॒वा य॒ज्ञन्न॑यन्तु न॒ इत्याह॑ । दे॒वाने॒व य॒ज्ञनि॑यः
कुरु॑ते । दे॒वी द्या॒वापृ॑थि॒वी अनु॑ मे म॒सा॒थामि॑त्याह ।
आ॒भ्यामे॒वानु॑मतो य॒ज्ञस्य॑ शि॒रः सम्भ॑रति । ऋ॒द्ध्य॑ास॒मद्य॑ म॒खस्य॑
शि॒र इत्याह॑ । य॒ज्ञो वै म॒खः । ऋ॒द्ध्य॑ास॒मद्य॑ य॒ज्ञस्य॑ शि॒र इति॑
वावै॒तदा॑ह । म॒खाय॑ त्वा म॒खस्य॑ त्वा शी॒र्ष्ण इत्याह॑ ।
नि॒र्दि॒श्यैवै॑न॒द्धर॑ति ॥ 14 (10)

T.A.8.2.8

त्रि॒र॒हर॑ति । त्रय॑ इ॒मे लो॒काः । ए॒भ्य ए॒व लो॒केभ्यो॑ य॒ज्ञस्य॑ शि॒रः
स॒म्भ॑रति । तू॒ष्णीम् चतु॑र्थं॒ हर॑ति । अ॒परि॑मितादे॒व य॒ज्ञस्य॑ शि॒रः
स॒म्भ॑रति । मृ॒त्ख॒नाद॑ग्रे॒ हर॑ति । तस्मा॑न् मृ॒त्ख॒नः क॑रु॒ण्य॒तरः ।
इ॒य॒त्य॒ग्र आ॑सी॒रित्या॑ह । अ॒स्यामे॒वाछ॑म्बट्कारं॒ य॒ज्ञस्य॑ शि॒रः स॒म्भ॑रति ।
ऊ॒र्जम् वा॑ ए॒तं र॑सम् पृ॒थि॒व्या उ॒प॒दी॒का उ॒दि॒द॒ह॒न्ति । 15 (10)

T.A.8.2.9

यद्-व॒ल्मी॒कम् । यद्-व॒ल्मी॒क॒व॒पा स॑म्भारो भ॒वति॑ । ऊ॒र्जमे॒व र॑सम्
पृ॒थि॒व्या अ॒व॒रु॒न्धे । अथो॑ श्रो॒त्रमे॒व । श्रो॒त्रं ह्ये॒तत् पृ॒थि॒व्याः ।
यद्-व॒ल्मी॒कः । अ॒ब॒धि॒रो भ॑वति । य ए॒वं वे॒द । इ॒न्द्रो वृ॒त्राय॑
व॒ज्रमु॑द॒यच्छ॑त् । स य॒त्रय॑त्र॒ परा॑क्रमत । 16 (10)

T.A.8.2.10

तन्ना॑दि॒ध्रय॑त । स पू॒ती॒क॒स्त॒म्बे परा॑क्रमत । सोऽ॒दि॒ध्रय॑त । सोऽ॒ब्रवी॑त् ।
ऊ॒तिं वै मे॑ धा॒ इति॑ । तदू॒ती॒का॒ना-मू॒ती॒क॒त्वम् । यदू॒ती॒का भ॑वन्ति ।
य॒ज्ञायै॒वोति॑म् दधति । अ॒ग्नि॒जा अ॑सि प्र॒जाप॑ते॒ रेत॑ इत्या॒ह ।
य ए॒व र॑सः प॒शून् प्रा॑विशत् । 17 (10)

T.A.8.2.11

तमे॑वावरु॑न्धे । पञ्चै॑ते सम्भारा॑ भवन्ति । पाङ्क्तो॑ यज्ञः । यावाने॑व
यज्ञः । तस्य॑ शिरः॑ सम्भरति । यद्ग्राम्या॑णाम् पशूनाञ्चर्म॑णा
सम्भरे॑त् । ग्राम्यान् पशूञ्छु॑चाऽर्पयेत् । कृष्णाजिने॑न सम्भरति ।
आरण्याने॑व पशूञ्छु॑चाऽर्पयति । तस्मा॑त्-समावत्-पशूना॑म्
प्रजाय॑मानानाम् । 18 (10)

T.A.8.2.12

आरण्याः पशवः॑ कनीया॑ऽसः । शुचा॑ ह्यृताः । लोम॑तः सम्भरति ।
अतो॑ ह्यस्य॑ मे॒द्ध्यम् । परिगृ॑ह्या यन्ति । रक्ष॑सामप॒हत्यै । बहवो॑
हरन्ति । अपचि॑तिमे॒वास्मिन् दध॑ति । उद्ध॑ते सिक॒तोपो॑प्ते परि॑श्रिते
निद॑धति शान्त्यै॑ । मद॑न्तीभि॒रुप॑ सृजति । 19 (10)

T.A.8.2.13

तेज॑ ए॒वास्मिन् दधा॑ति । मधु॑ त्वा मधु॒ला क॑रोत्वित्याह । ब्रह्म॑णै॒वास्मिन्
-तेजो॑ दधाति । यद्ग्राम्या॑णाम् पात्रा॑णाम् क॒पालैः स॑ऽसृज॑त् ।
ग्राम्या॑णि पात्रा॑णि शुचा॑ऽर्पयेत् । अ॒र्मक॑पालैः स॑ऽसृजति । ए॒तानि॑
वा अ॒नुप॑जीवनीयानि । तान्ये॑व शुचा॑ऽर्पयति । शर्करा॑भिः स॑ऽसृजति

धृत्यै॑ । अथो॑ श॒न्त्वाय॑ () । अ॒जलो॑मैः स॒ऽसृ॑जति । ए॒षा वा॑ अ॒ग्नेः
प्रि॒या त॒नूः । यद॒जा । प्रि॒ययै॑वैन॒म् त॒नुवा॑ स॒ऽसृ॑जति । अथो॑ ते॒जसा॑ ।
कृ॒ष्णाजि॑नस्य लो॒मभिः॑ स॒ऽसृ॑जति । य॒ज्ञो वै॑ कृ॒ष्णाजि॑नम् ।
य॒ज्ञेनै॑व य॒ज्ञः स॒ऽसृ॑जति । 20 (18)

(या॒जायै॑ – न जु॒हुया॑ – द॒वि॒शद् – वे॒णुः – शान्त्यै॑ –
प॒ङ्क्ति॑राध॒समि॑त्याह – ह॒रति॑ – दि॒हन्ति॑ – प॒राक्रम॑ – ता॒र्विश॑त् –
प्र॒जाय॑मानाना॒ऽसृ॑जति – श॒न्त्वाया॑ ष्ठी च) (A2)

अनुवाकम् – 3

T.A.8.3.1

परि॑श्रिते करोति । ब्र॒ह्मव॑र्चसस्य परि॑गृहीत्यै॑ । न कु॒र्वन्न॑भि प्रा॒ण्यात्॑ ।
यत् कु॒र्वन्न॑भि प्रा॒ण्यात्॑ । प्रा॒णाञ्छु॑चा॒र्पये॑त् । अ॒पहा॑य प्रा॒णिति॑ ।
प्रा॒णाना॑म् गो॒पीथा॑य । न प्र॒व॒र्ग्यम्–चा॒दित्य॑म्–चा॒न्तरे॑यात् ।
यद॒न्तरे॑यात् । दु॒श्च॒र्मा स्या॑त् । 21 (10)

T.A.8.3.2

तस्मा॑न्ना॒न्तरा॑य्यम् । आ॒त्मनो॑ गो॒पीथा॑य । वे॒णुना॑ करोति ।

तेजो॑ वै वे॒णुः । तेजः॑ प्रव॒र्ग्यः । तेज॑सै॒व तेजः॑ सम॒र्द्धय॑ति ।

म॒खस्य॑ शिरोऽसी॒त्याह॑ । य॒ज्ञो वै म॒खः । तस्यै॒तच्छि॑रः ।

यत् प्रव॒र्ग्यः । 22 (10)

T.A.8.3.3

तस्मा॑दे॒वमा॑ह । य॒ज्ञस्य॑ पदे॒ स्थ इ॒त्याह॑ । य॒ज्ञस्य॑ हो॒ते पदे॑ ।

अथो॑ प्र॒तिष्ठि॑त्यै । गा॒यत्रे॑ण त्वा छ॒न्दसा॑ करो॒मीत्या॑ह । छ॒न्दोभि॑रे॒वैन॑म्
करो॑ति । त्र्यु॒द्धिम् करो॑ति । त्रय॑ इ॒मे लो॒काः । ए॒षान् लो॒काना॑माप्स्यै॑ ।

छ॒न्दोभिः॑ करो॑ति । 23 (10)

T.A.8.3.4

वी॒र्य॑म् वै छ॒न्दाँ॒सि । वी॒र्ये॑णै॒वैन॑म् करो॑ति । य॒जुषा॑ बि॒लम् करो॑ति
व्या॒वृ॒त्यै । इ॒यन्त॑म् करो॑ति । प्र॒जाप॑तिना य॒ज्ञमु॒खेन॑ स॒म्मित॑म् ।

इ॒यन्त॑म् करो॑ति । य॒ज्ञप॑रुषा स॒म्मित॑म् । इ॒यन्त॑म् करो॑ति ।

ए॒ताव॑द्वै पु॒रुषे॑ वी॒र्य॑म् । वी॒र्य॑स॒म्मित॑म् । 24 (10)

T.A.8.3.5

अ॒परि॑मितम् करो॑ति । अ॒परि॑मित॒स्याव॑रुद्ध्यै । प॒रि॒ग्री॒वम् करो॑ति धृ॒त्यै ।

सूर्य॑स्य॒ हर॑सा श्रा॒येत्या॑ह । य॒थाय॑जु॒रेवै॑तत् । अ॒श्वश॑केन॒ धूप॑यति ।

प्राजाप॒त्यो वा अ॒श्वः स॒योनि॒त्वाय॑ । वृ॒ष्णो अ॒श्वस्य॑ नि॒ष्पद॑सीत्याह ।
असौ वा आ॒दित्यो॑ वृ॒षाऽश्वः॑ । तस्य॑ छन्दा॒ऽसि नि॒ष्पत् । 25 (10)

T.A.8.3.6

छन्दा॑भिरे॒वैनम्॑ धूपयति । अ॒र्चिषे॑ त्वा शोचिषे॑ त्वेत्याह ।
तेज॑ ए॒वास्मिन्॑ दधाति । वा॒रुणो॑ऽभी॒द्धः । मै॒त्रियो॑पैति शान्त्यै॑ ।
सिद्ध्यै॑ त्वेत्याह । यथा॑यजुरे॒वैतत् । दे॒वस्त्वा स॒वितो॑द्वपत्वित्याह ।
स॒वितृ॑प्रसूत ए॒वैनम्॑ ब्रह्म॒णा दे॒वता॑भिरुद्वपति ।
अप॑द्यमानः पृथि॒व्यामा॑शा दि॒श आ॒पृणे॑त्याह । 26 (10)

T.A.8.3.7

तस्मा॑द॒ग्निः सर्वा॑ दि॒शोऽनु॑ विभाति । उत्तिष्ठ॑ बृ॒हन्-भ॒वोर्ध्व॑स्तिष्ठ
ध्रु॒वस्त्वमि॑त्याह प्र॒तिष्ठि॑त्यै । ई॒श्वरो॑ वा ए॒षोऽन्धो॑ भवितोः ।
यः प्र॒वर्ग्य॑मन्वीक्षते । सूर्य॑स्य त्वा चक्षु॒षाऽन्वी॑क्ष इत्याह ।
चक्षु॑षो गोपी॒थाय॑ । ऋज॑वे॒ त्वा सा॒धवे॑ त्वा सु॒क्षित्यै॑
त्वा भू॒त्यै त्वे॑त्याह । इ॒यं वा॑ ऋजुः । अ॒न्तरि॑क्ष॒ऽसाधु॑ ।
असौ सु॒क्षितिः॑ । 27 (10)

T.A.8.3.8

दि॒शो भू॒तिः । इ॒मा॒ने॒वास्मै॑ लो॒कान् क॑ल्पयति । अथो॒ प्रति॑ष्ठित्यै ।
 इ॒द-म॒ह-म॒मु॒मा॒मुष्या॑यणम् वि॒शा प॒शुभि॑र्-ब्र॒ह्मव॑र्च॒सेन॑
 पर्यू॑हामीत्याह । वि॒शै॒वैन॑म् प॒शुभि॑र्-ब्र॒ह्मव॑र्च॒सेन॑ पर्यू॑हति ।
 वि॒शेति॑ रा॒ज॒न्य॑स्य ब्रूयात् । वि॒शै॒वैन॑म् पर्यू॑हति । प॒शुभि॑रिति॒ वैश्य॑स्य ।
 प॒शुभि॑रे॒वैन॑म् पर्यू॑हति । अ॒सुर्य॑म् पा॒त्रम॑नाच्छृ॒ण्णम् ॥ 28 (10)

T.A.8.3.9

आच्छृ॒णत्ति । दे॒व॒त्राऽकः॑ । अ॒जक्षी॑रेणाच्छृ॒णत्ति । पर॑मं वा ए॒तत्
 प॒यः । य॒द॒जक्षी॑रम् । पर॑मे॒णै॒वैन॑म् प॒यसाऽऽच्छृ॑णत्ति । य॒जुषा॑
 व्यावृ॑त्यै । छ॒न्दो॑भि॒राच्छृ॑णत्ति । छ॒न्दो॑भि॒र्वा ए॒ष क्रि॑यते । छ॒न्दो॑भि॒रेव॑
 छ॒न्दा॑ꣳस्याच्छृ॒णत्ति () । छृ॒न्धि वा॒चमि॑त्याह । वा॒चमे॑वाव॒रुन्धे॑ ।
 छृ॒न्ध्यूर्ज॑मित्याह । ऊ॒र्जमे॑वाव॒रुन्धे॑ । छृ॒न्धि ह॒विरि॑त्याह । ह॒विरे॑वाकः ।
 दे॒व पु॒रश्च॑र स॒ध्यास॑न्त्वेत्याह । यथा॒य॒जु॒रेवै॑तत् । 29 (18)

(स्याद्- यत् प्र॒व॒र्ग्यः - छ॒न्दो॑भिः करोति - वी॒र्यं॑ स॒म्मित॑म् -
 छ॒न्दा॑ꣳसि निष्पत् - पृ॒णेत्या॑ह - सु॒क्षिति॑ - र॒नाच्छृ॑ण्णम् -

छन्दा॒ऽस्याच्छृ॑ण॒ त्यष्टौ॑ च) (A3)

अनुवाकम् – 4

T.A.8.4.1

ब्र॒ह्मन् प्र॑चरि॒ष्यामो॑ हो॒तर्-घ॑र्ममभि॒ष्टुही॑त्याह । ए॒ष वा ए॒तर्हि॑
बृ॒हस्प॑तिः । यद्ब्र॒ह्मा । तस्मा॑ ए॒व प्र॑तिप्रो॒च्य प्र॑चरति ।
आ॒त्मनो॑ऽना॒र्त्ये । य॒माय॑ त्वा म॒खाय॑ त्वे॒त्याह॑ । ए॒ता वा ए॒तस्य॑
दे॒वताः॑ । ताभि॑रे॒वैन॑ऽ सम॒र्द्धय॑ति । म॒दन्ती॑भिः प्रो॒क्षति॑ ।
ते॒ज ए॒वास्मिन्॑ दधाति । 30 (10)

T.A.8.4.2

अ॒भिपूर्व॑म् प्रो॒क्षति॑ । अ॒भिपूर्व॑-मे॒वास्मिन्-ते॒जो द॑धाति ।
त्रिः प्रो॒क्षति॑ । त्र्या॒वृद्धि॑ य॒ज्ञः । अथो॑ मे॒द्ध्यत्वा॑य । हो॒ताऽन्वा॑ह ।
रक्ष॑सामप॒हत्यै॑ । अ॒नवा॑नम् । प्रा॒णाना॑ऽ स॒न्तत्यै॑ ।
त्रि॒ष्टुभः॑ स॒तीर्-गा॑य॒त्रीरि॒वान्वा॑ह । 31 (10)

T.A.8.4.3

गा॒यत्रो॑ हि प्रा॒णः । प्रा॒णमे॒व य॑ज॒माने॑ दधाति । स॒न्तत॑मन्वा॒ह ।
प्रा॒णाना॑मन्नाद्यस्य स॒न्तत्यै॑ । अथो॑ रक्ष॑सामप॒हत्यै॑ ।

यत् परिमिता अनुब्रूयात् । परिमितमवरुन्धीत । अपरिमिता अन्वाह ।
अपरिमितस्यावरुद्ध्यै । शिरो वा एतद्-यज्ञस्य । 32 (10)

T.A.8.4.4

यत् प्रवर्ग्यः । ऊर्ध्वमुञ्जाः । यन् मौञ्जो वेदो भवति । ऊर्जैव
यज्ञस्य शिरः समर्द्धयति । प्राणाहुतीर्-जुहोति । प्राणानेव यजमाने
दधाति । सप्त जुहोति । सप्त वै शीर्षण्याः प्राणाः । प्राणाने
वास्मिन् दधाति । देवस्त्वा सविता मद्ध्वाऽनक्तित्याह । 33 (10)

T.A.8.4.5

तेजसैवैनमनक्ति । पृथिवीम् तपसस्त्रायस्वेति हिरण्यमुपास्यति ।
अस्या अनतिदाहाय । शिरो वा एतद्-यज्ञस्य । यत् प्रवर्ग्यः ।
अग्निः सर्वा देवताः । प्रलवानादीप्योपास्यति ।
देवतास्वेव यज्ञस्य शिरः प्रतिदधाति । अप्रतिशीर्णाग्रम् भवति ।
एतद्-बर्हिर्ह्येषः । 34 (10)

T.A.8.4.6

अर्चिरसि शोचिरसीत्याह । तेज एवास्मिन् ब्रह्मवर्चसम् दधाति ।
सःसीदस्व महान् असीत्याह । महान् ह्येषः । ब्रह्मवादिनो वदन्ति ।

ए॒ते वा॒व त ऋ॒त्विजः॑ । ये॒ दर्श॑पूर्ण॒मास॑योः । अथ॒ कथा॑ होता
यज॑मानाया॒शिषो॑ नाशा॒स्त इति॑ । पु॒रस्ता॑दाशीः॒ खलु॑ वा
अन्यो॑ य॒ज्ञः । उप॑रि॒ष्टादा॑शीरन्यः । 35 (10)

T.A.8.4.7

अना॑धृष्या पु॒रस्ता॑दिति॒ यदे॑तानि॒ यजू॑ष्याह । शी॒र्षत॑ ए॒व य॒ज्ञस्य॑
यज॑मान आ॒शिषो॑ऽव॒रुन्धे॑ । आयुः॑ पु॒रस्ता॑दाह । प्र॒जाम् दक्षि॑णतः ।
प्रा॒णम् पश्चा॑त् । श्रो॒त्रमु॑त्तरतः । वि॒धृति॑मु॒परि॑ष्टात् । प्रा॒णाने॒वास्मै॑
समी॑चो दधाति । ई॒श्वरो॑ वा ए॒ष दि॒शोऽनु॑न्मदितोः ।
यन्दि॑शोऽनु॒ व्या॑स्थापयन्ति । 36 (10)

T.A.8.4.8

मनो॑रश्वाऽसि॒ भूरि॑पु॒त्रेती॒मा-म॑भि॒मृश॑ति । इ॒यं वै मनो॑रश्वा॒ भूरि॑पु॒त्रा ।
अस्या॑मे॒व प्र॑ति॒तिष्ठ॑त्यनु॒न्मादा॑य । सू॒पस॑दा मे॒ भूया॑ मा मा
हि॒ऽसीरि॑त्याहा॒हि॒ऽसा॑यै । चि॒तः स्थ॑ परि॒चित॑ इत्याह ।
अप॑चि॒तिमे॒वास्मि॑न् दधाति । शि॒रो वा ए॒तद्-य॒ज्ञस्य॑ । यत् प्र॑व॒र्ग्यः ।
असौ॑ खलु॒ वा आ॑दि॒त्यः प्र॑व॒र्ग्यः । तस्य॑ म॒रुतो॑ र॒श्मयः॑ । 37 (10)

T.A.8.4.9

स्वाहा मरुद्भिः परिश्रयस्वेत्याह । अमुमेवादित्यं रश्मिभिः पर्यूहति ।
तस्मा-दसावादित्योऽमुष्मिन् लोके रश्मिभिः पर्यूढः । तस्माद्-राजा
विशा पर्यूढः । तस्माद्-ग्रामणीः सजातैः पर्यूढः । अग्नेः सृष्टस्य
यतः । विकङ्कतम् भा आच्छत् । यद् वैकङ्कताः परिधयो भवन्ति ।
भा एवावरुन्धे । द्वादश भवन्ति । 38 (10)

T.A.8.4.10

द्वादश मासाः सम्वत्सरः । सम्वत्सरमेवावरुन्धे । अस्ति त्रयोदशो
मास इत्याहुः । यत् त्रयोदशः परिधिर्भवति । तेनैव त्रयोदशम्
मासमवरुन्धे । अन्तरिक्षस्यान्तर्-द्विरसीत्याह व्यावृत्त्यै ।
दिवम् तपसस्त्रायस्वे-त्युपरिष्ठा-द्विरण्यमधि निदधाति ।
अमुष्या अनतिदाहाय । अथो आभ्यामेवैनमुभयतः परिगृह्णाति ।
अर्हन् बिभर्षि सायकानि धन्वेत्याह । 39 (10)

T.A.8.4.11

स्तौत्येवैनमेतत् । गायत्रमसि त्रैष्टुभमसि जागतमसीति धवित्राण्यादत्ते ।
छन्दोभिरेवैनान्यादत्ते । मधु मध्विति धूनोति । प्राणो वै मधु ।

प्रा॒णमे॒व य॒ज॒मा॒ने द॒धा॒ति । त्रिः॑ परि॒य॒न्ति । त्रि॒वृ॒द्धि प्रा॒णः ।

त्रिः॑ परि॒य॒न्ति । त्र्या॑वृ॒द्धि य॒ज्ञः । 40 (10)

T.A.8.4.12

अथो॑ रक्ष॒साम॑प॒हत्यै॑ । त्रिः॑ पुनः॑ परि॒य॒न्ति । षट्॑त् सम्प॒द्यन्ते॑ ।
षड्॑वा ऋ॒तवः॑ । ऋ॒तुष्वे॒व प्र॒ति॒ति॒ष्ठन्ति॑ । यो वै घ॒र्मस्य॑ प्रि॒यान्-
त॒नुव॑मा॒क्राम॑ति । दु॒श्श्म॑र्मा वै स भ॒वति॑ । ए॒ष ह॒ वा अ॒स्य
प्रि॒यान् त॒नुव॑मा॒क्राम॑ति । यत् त्रिः॑ परी॒त्य च॒तु॒र्थम् पर्ये॑ति ।

ए॒ता॒ ह॒ वा अ॒स्यो॒ग्रदे॑वो॒ राज॑नि॒राच॑क्राम । 41 (10)

T.A.8.4.13

ततो॑ वै स दु॒श्श्म॑र्माऽभ॒वत् । तस्मा॑त् त्रिः॑ परी॒त्य न च॒तु॒र्थम् परी॑यात् ।
आ॒त्मनो॑ गोपी॒थाय॑ । प्रा॒णा वै ध॒वि॒त्राणि॑ । अ॒व्य॒ति॒षङ्ग॑म् धू॒न्वन्ति॑ ।
प्रा॒णाना॑-म॒व्य॒ति॒षङ्गाय॑ क्लृ॒प्त्यै॑ ॥ वि॒नि॒षद्य॑ धू॒न्वन्ति॑ । दि॒क्ष्वे॒व
प्र॒ति॒ति॒ष्ठन्ति॑ । ऊ॒र्ध्वन्धू॑न्वन्ति । सु॒व॒र्गस्य॑ लो॒कस्य॑
सम॑ष्ट्यै () । स॒र्वतो॑ धू॒न्वन्ति॑ । तस्मा॑दय॑ सर्व॒तः प॑वते । 42 (12)

(द॒धा- ती॒वान्वा॑ह - य॒ज्ञ - स्या॑है - ष - उ॒परि॑ष्ठादाशीर॒न्यो -
 व्या॒स्था॒पय॑न्ति - र॒श्मयो॑ - भ॒वन्ति॑ - ध॒न्वेत्या॑ह - य॒ज्ञ -
 श्र॒क्राम॑ - स॒मष्ट्यै॑ द्वे च) (A4)

अनुवाकम् - 5

T.A.8.5.1

अ॒ग्नि॒ष्ट्वा व॑सु॒भिः पु॒रस्ता॑द्-रोच॒यतु॑ गाय॒त्रेण॑ छ॒न्दसे॑त्याह ।
 अ॒ग्नि॒रेवैनं॑ व॒सु॒भिः पु॒रस्ता॑द्-रोच॒यति॑ गाय॒त्रेण॑ छ॒न्दसा॑ ।
 स मा रु॒चितो॑ रोच॒येत्या॑ह । आ॒शिष॑मे॒वैता॑माशास्ते । इन्द्र॑स्त्वा
 रु॒द्रैर्-दक्षि॑णतो रोच॒यतु॑ त्रै॒ष्टुभे॑न छ॒न्दसे॑त्याह । इन्द्र॑ ए॒वैनं॑ रु॒द्रैर्-
 दक्षि॑णतो रोच॒यति॑ त्रै॒ष्टुभे॑न छ॒न्दसा॑ । स मा रु॒चितो॑ रोच॒येत्या॑ह ।
 आ॒शिष॑मे॒वैता॑माशास्ते । वरु॑णस्त्वाऽऽदि॒त्यैः प॒श्चाद्-रोच॑यतु
 जा॒गते॑न छ॒न्दसे॑त्याह । वरु॑ण ए॒वैनमा॑दि॒त्यैः प॒श्चाद्-रोच॑यति
 जा॒गते॑न छ॒न्दसा॑ । 43 (10)

T.A.8.5.2

स मा रुचितो रोचयेत्याह । आशिषमेवैतामाशास्ते ॥ द्युतानस्त्वा
 मारुतो मरुद्भिरुत्तरतो रोचयत्वानुष्टुभेन छन्दसेत्याह । द्युतान एवैनम्
 मारुतो मरुद्भिरुत्तरतो रोचयत्वानुष्टुभेन छन्दसा । स मा रुचितो
 रोचयेत्याह । आशिषमेवैतामाशास्ते ॥ बृहस्पतिस्त्वा विश्वैर्-
 देवैरुपरिष्ठाद्-रोचयतु पाङ्केन छन्दसेत्याह । बृहस्पतिरेवैनम् विश्वैर्-
 देवैरुपरिष्ठाद्-रोचयति पाङ्केन छन्दसा । स मा रुचितो रोचयेत्याह ।
 आशिषमेवैतामाशास्ते ॥ 44 (10)

T.A.8.5.3

रोचितस्त्वम् देव घर्म देवेष्वसीत्याह । रोचितो ह्येष देवेषु ।
 रोचिषीयाहम् मनुष्येष्वित्याह । रोचत एवैष मनुष्येषु । सम्राड् घर्म
 रुचितस्त्वन् देवेष्वायुष्मा ७ स्तेजस्वी ब्रह्मवर्चस्यसीत्याह ।
 रुचितो ह्येष देवेष्वायुष्मा ७ स्तेजस्वी ब्रह्मवर्चसी । रुचितोऽहम्
 मनुष्येष्वायुष्मा ७ स्तेजस्वी ब्रह्मवर्चसी भूयासमित्याह । रुचित एवैष
 मनुष्येष्वायुष्मा ७ स्तेजस्वी ब्रह्मवर्चसी भवति । रुगसि रुचम् मयि

धेहि मयि रुगित्याह । आशिषमेवैतामाशास्ते () । तं यदेतैर्-
यजुर्भिररोचयित्वा । रुचितो घर्म इति प्रब्रूयात् । अरोचुकोऽध्वर्युः
स्यात् । अरोचुको यजमानः । अथ यदेनमेतैर्यजुर्भी रोचयित्वा ।
रुचितो घर्म इति प्राह । रोचुकोऽध्वर्युर् भवति ।
रोचुको यजमानः । 45 (18)

(पश्चाद् रोचयति जगतेन छन्दसा – पाङ्गेन छन्दसा स मा रुचितो
रोचयेत्याहाशिषमेवैतामाशास्ते – शास्ते ऽष्टौ च) (A5)

अनुवाकम् – 6

T.A.8.6.1

शिरो वा एतद्-यज्ञस्य । यत् प्रवर्ग्यः । ग्रीवा उपसदः ।
पुरस्तादुपसदाम् प्रवर्ग्यम् प्रवृणक्ति । ग्रीवास्वेव यज्ञस्य शिरः
प्रतिदधाति । त्रिः प्रवृणक्ति । त्रय इमे लोकाः । एभ्य एव लोकेभ्यो
यज्ञस्य शिरोऽवरुन्धे । षट् संपद्यन्ते । षड्वा ऋतवः । 46 (10)

T.A.8.6.2

ऋ॒तु॒भ्य॑ ए॒व य॒ज्ञस्य॑ शि॒रोऽव॑रुन्धे । द्वा॒दश॑ कृ॒त्वः प्र॑वृणक्ति ।
द्वा॒दश॑ मा॒साः स॒म्व॑त्सरः । स॒म्व॑त्सरादे॒व य॒ज्ञस्य॑ शि॒रोऽव॑रुन्धे ।
चतु॑र्विं॒शतिः॑ स॒म्पद्य॑न्ते । चतु॑र्विं॒शति॑रर्द्धमा॒साः । अ॒र्द्धमा॒सेभ्य॑ ए॒व
य॒ज्ञस्य॑ शि॒रोऽव॑रुन्धे । अथो॑ खलु । स॒कृदे॒व प्र॑वृज्यः ।

ए॒कं॑ हि शि॒रः । 47 (10)

T.A.8.6.3

अ॒ग्नि॒ष्टोमे॑ प्र॑वृणक्ति । ए॒तावा॑न् वै य॒ज्ञः । या॒वा॒न॒ग्नि॒ष्टोमः॑ । या॒वा॒ने॒व
य॒ज्ञः । तस्य॑ शि॒रः प्र॑तिदधाति । नो॒क्थ्ये॑ प्र॑वृज्यात् । प्र॒जा वै प॒शव॑
उ॒क्थानि॑ । यदु॒क्थ्ये॑ प्र॑वृज्यात् । प्र॒जाम् प॒शून्स्य॑ निर्द॑हेत् ।

वि॒श्वजि॑ति॒ सर्व॑पृष्ठे प्र॑वृणक्ति । 48 (10)

T.A.8.6.4

पृ॒ष्ठानि॑ वा अ॒च्युत॑ज्यावयन्ति । पृ॒ष्ठैरे॒वास्मा॑
अ॒च्युत॑ज्यावयित्वाऽव॑रुन्धे । अ॒पश्य॑म् गो॒पामि॑त्याह । प्रा॒णो वै
गो॒पाः । प्रा॒णमे॒व प्र॒जासु॑ वि॒यात॑यति । अ॒पश्य॑म् गो॒पामि॑त्याह ।
अ॒सौ वा आ॑दि॒त्यो गो॒पाः । स ही॑माः प्र॒जा गो॒पाय॑ति ।

तमे॒व प्र॒जाना॑म् गो॒प्तार॑म् कुरु॒ते । अनि॑पद्यमानमित्याह । 49 (10)

T.A.8.6.5

न ह्ये॒ष नि॑पद्यते । आ च॒ परा॑ च पथि॑भिश्चरन्तमित्याह । आ च ह्ये॒ष
परा॑ च पथि॑भिश्चरति । स स॒द्धी॒चीः स वि॒षू॒चीर्व॑सान इत्याह ।

स॒द्धी॒चीश्च॑ ह्ये॒ष वि॒षू॒चीश्च॑ व॒सानः॑ प्र॒जा अभि॑ विपश्यति ।

आ व॒रीव॑र्ति भुवने॑ष्वन्तरित्याह । आ ह्ये॒ष व॒रीव॑र्ति भुवने॑ष्वन्तः ।

अत्र॑ प्रा॒वीर्म॑धु मा॒द्ध्वी॑भ्याम् मधु॑ मा॒धू॒चीभ्या॑मित्याह ।

वा॒सन्ति॑कावे॒वास्मा॑ ऋतू॑ कल्पयति ।

सम॑ग्निर॒ग्निना॑ गते॒त्याह॑ । 50 (10)

T.A.8.6.6

गै॒ष्मावे॒वास्मा॑ ऋतू॑ कल्पयति । सम॑ग्निर॒ग्निना॑ गते॒त्याह॑ ।

अ॒ग्निर्ह्ये॒षोऽग्नि॑ना सङ्गच्छ॑ते । स्वाहा॑ सम॑ग्निस्तपसा॑ गते॒त्याह॑ ।

पूर्व॑मे॒वादित॑म् । उत्त॑रेणाभिगृणाति । ध॒र्ता दि॒वो वि॒भा॒सि रज॑सः

पृथि॑व्या इत्याह । वा॒र्षिका॑वे॒वास्मा॑ ऋतू॑ कल्पयति ।

ह॒दे त्वा॑ मन॑से त्वे॒त्याह॑ । शा॒रदा॑वे॒वास्मा॑ ऋतू॑ कल्पयति । 51 (10)

T.A.8.6.7

दिवि॑ दे॒वेषु॑ हो॒त्रा य॒च्छे॒त्याह॑ । हो॒त्राभि॑रे॒वेमा॑न् लो॒कान्त् स॒म् द॑धाति ।
विश्वा॑साम् भु॒वाम् प॒त इ॒त्याह॑ । है॒मन्ति॑कावे॒वास्मा॑ ऋ॒तू क॑ल्पयति ।
दे॒वश्रू॑स्त्वम् दे॒व घ॑र्म दे॒वान् पा॑हीत्याह । शौ॒शिरा॑वे॒वास्मा॑ ऋ॒तू
क॑ल्पयति । तपो॑जां वा॒चम॑स्मै निय॒च्छ दे॒वायु॑वमित्याह ।
या वै मे॒द्ध्या वाक् । सा तपो॑जाः । तामे॒वावरु॑न्धे । 52 (10)

T.A.8.6.8

ग॒र्भो दे॒वाना॑मित्याह । ग॒र्भो ह्ये॒ष दे॒वाना॑म् । पि॒ता म॑तीनामित्याह ।
प्र॒जा वै म॑तयः । ता॒सामे॒ष ए॒व पि॒ता । यत् प्र॑वर्ग्यः । तस्मा॑दे॒वमा॑ह ।
प॒तिः प्र॒जाना॑मित्याह । प॒तिर्ह्ये॒ष प्र॒जाना॑म् ।
म॒तिः क॑वीनामित्याह । 53 (10)

T.A.8.6.9

म॒तिर्ह्ये॒ष क॑वीनाम् । स॒म् दे॒वो दे॒वेन॑ स॒वित्रा॑ ऽयतिष्ठ सꣳ
सू॒र्येणा॑रुक्तेत्याह । अ॒मुञ्चै॒वादित्य॑म् प्र॑वर्ग्यञ्च सꣳशा॑स्ति ।
आ॒युर्दा॑स्त्वम॒स्मभ्य॑म् घ॒र्म व॑र्चो॒दा अ॒सीत्या॑ह ।
आ॒शिष॑मे॒वैता॑माशा॒स्तो । पि॒ता नो॑ऽसि पि॒ता नो॑ बो॒धेत्या॑ह ।

बोध॑यत्ये॒वैन॑म् । न वै ते॑ऽवका॒शा भ॑वन्ति । प॒त्नियै॑ द॒शमः॑ ।

न॒व वै पु॑रु॒षे प्रा॑णाः । 54 (10)

T.A.8.6.10

नाभि॑र्द॒शमी॑ । प्रा॒णाने॒व यज॑माने दधाति । अथो॑ द॒शाक्ष॑रा वि॒राट् ।

अन्नं॑ वि॒राट् । वि॒राजै॒वान्नाद्य॑मवरुन्धे । य॒ज्ञस्य॑ शि॒रोऽच्छि॑द्यत ।

तद्-दे॒वा हो॑त्राभिः प्रत्य॑दधुः । ऋ॒त्विजो॑ऽवेक्ष॒न्ते । ए॒ता वै हो॑त्राः ।

हो॑त्राभिरे॒व य॒ज्ञस्य॑ शि॒रः प्र॑ति॒दधा॑ति । 55 (10)

T.A.8.6.11

रु॒चित॑मवेक्ष॒न्ते । रु॒चिता॑द्वै प्र॒जाप॑तिः प्र॒जा अ॑सृजत । प्र॒जाना॑ऽ

सृ॒ष्ट्यै॑ । रु॒चित॑मवेक्ष॒न्ते । रु॒चिता॑द्वै पर्ज॒न्यो व॑र्षति । व॒र्षुः

पर्ज॒न्यो भ॑वति । सम् प्र॒जा ए॑धन्ते । रु॒चित॑मवेक्ष॒न्ते ।

रु॒चित॑म् वै ब्र॒ह्मव॑र्चसम् । ब्र॒ह्मव॑र्चसि॒नो भ॑वन्ति । 56 (10)

T.A.8.6.12

अ॒धीय॑न्तोऽवेक्ष॒न्ते । सर्व॑मायुर्यन्ति । न प॒त्न्यवे॑क्षेत । यत् प॒त्न्यवे॑क्षेत ।

प्र॒जाये॑त । प्र॒जान्त्व॑स्यै निर्द॑हेत् । य॒न्नावे॑क्षेत । न प्र॒जाये॑त ।

नास्यै॑ प्र॒जान्नि॑र्दहेत् । ति॒रस्कृ॑त्य य॒जुर् वा॑चयति () । प्र॒जाय॑ते ।

ना॒स्यै॑ प्र॒जान्नि॑र्द॒हति॑ । त्व॒ष्टी॑मती ते स॒पेये॑त्याह ।

स॒पा॒ब्धि॑ प्र॒जाः प्र॒जाय॑न्ते । 57 (14)

(ऋ॒तवो॑ – हि शि॒रः – सर्व॑पृ॒ष्ठे प्र॑वृ॒ण – क॒त्यनि॑पद्यमानमित्याह –
गते॑त्याह – शार॒दावे॑वास्मा॒ ऋ॒तू क॑ल्पयति – रु॒न्धे – क॒विना॑मित्याह
– प्रा॒णाः – प्र॒ति॑दधाति – भ॒वन्ति॑ – वा॒चय॑ति च॒त्वारि॑ च) (A6)

अनुवाकम् – 7

T.A.8.7.1

दे॒वस्य॑ त्वा स॒वि॒तुः प्र॑स॒व इति॑ र॒शना॑मादत्ते प्र॒सू॒त्यै॑ । अ॒श्विनो॑र्-
बा॒हुभ्या॑मित्याह । अ॒श्विनो॑ हि दे॒वाना॑म॒ध्वर्यू॑ आ॒स्ताम्॑ । पू॒ष्णो
ह॒स्ताभ्या॑मित्याह य॒त्यै॑ । आ॒ददे॑ऽदित्यै रा॒स्नाऽसी॑त्याह य॒जुष्क॑त्यै ।
इ॒ड ए॒ह्यदि॑त ए॒हि स॒रस्व॑त्येहीत्याह । ए॒तानि॑ वा अ॒स्यै॑ दे॒वना॑मानि ।
दे॒वना॑मै॒रेवै॑ना-मा॒ह्वय॑ति । अ॒सावे॑ह्य-सा॒वेह्य॑-सा॒वेही॑त्याह ।
ए॒तानि॑ वा अ॒स्यै॑ म॒नुष्य॑ना॒मानि॑ । 58 (10)

T.A.8.7.2

मनु॒ष्यना॒मैरे॒वैना॒माह्व॑यति । षट्थ् सम्प॑द्यन्ते । षड्वा ऋ॒तवः॑ ।
 ऋ॒तुभिरे॒वैना॒माह्व॑यति । अदि॒त्या उ॒ष्णीष॑मसीत्याह । यथा॒यजु॑रेवैतत् ।
 वा॒युर॒स्यैड॑ इत्याह । वा॒युदे॒वत्यो॑ वै व॒थ्सः॑ ।
 पू॒षा त्वो॒पाव॑सृज॒त्वित्या॑ह । पौ॒ष्णा वै दे॒वत॑या प॒शवः॑ । 59 (10)

T.A.8.7.3

स्वयै॒वैन॑म् दे॒वत॑यो॒पाव॑सृजति । अ॒श्विभ्या॑म् प्र॒दाप॑येत्याह । अ॒श्विनौ॑
 वै दे॒वाना॑म् भिष॒जौ । ताभ्या॑मे॒वास्मै॑ भेष॒जम् क॑रोति । यस्ते॑ स्तनः
 शश॑य इत्याह । स्तौत्यै॒वैन॑म् । उ॒स्र घ॒र्मञ् शि॒षो॒स्र घ॒र्मम् पा॑हि
 घ॒र्माय॑ शि॒षेत्या॑ह । यथा॑ ब्रू॒याद॒मुष्मै॑ दे॒हीति॑ । तादृ॑गे॒व तत् ।
 बृ॒हस्प॑तिस्त्वो॒पसी॑द॒त्वित्या॑ह । 60 (10)

T.A.8.7.4

ब्र॒ह्म वै दे॒वाना॑म् बृ॒हस्प॑तिः । ब्र॒ह्मणै॒वैना॑मु॒पसी॑दति । दान॑वः स्थ
 पेर॑व इत्याह । मे॒द्ध्याने॒वैनान्क॑रोति । वि॒ष्वग्वृ॑तो लो॒हिते॒नेत्या॑ह
 व्या॒वृत्त्यै॑ । अ॒श्विभ्या॑म् पि॒न्वस्व॑ सर॒स्वत्यै॑ पि॒न्वस्व॑ पू॒ष्णो पि॒न्वस्व॑
 बृ॒हस्प॑तये पि॒न्वस्वे॒त्याह॑ । ए॒ताभ्यो॑ ह्ये॒षा दे॒वता॑भ्यः पि॒न्वते॑ ।

इन्द्राय॑ पि॒न्वस्वेन्द्रा॑य पि॒न्वस्वेत्या॑ह । इन्द्र॑मे॒व भा॒गधे॑ये॒न स॒मर्द्ध॑यति ।
द्वि॒रिन्द्रा॑येत्या॒ह । 61 (10)

T.A.8.7.5

तस्मा॑दिन्द्रो॑ दे॒वता॑नाम् भूयि॑ष्ठभा॒क्तमः॑ । गा॒यत्रो॑ऽसि त्रै॒ष्टुभो॑ऽसि
जा॒गत॑मसीति॑ शफो॑पय॒माना॑दत्ते । छन्दो॑भिरे॒वैना॑नादत्ते । सहो॑र्जो
भा॒गेनो॑पमे॒हीत्या॑ह । ऊ॒र्ज ए॒वैन॑म् भा॒गम॑कः । अ॒श्विनौ॑ वा ए॒तद्-
य॒ज्ञस्य॑ शि॒रः प्र॑ति॒दध॑तावब्रू॒ताम् । आ॒वाभ्या॑मे॒व पूर्वा॑भ्यां
ँव॒षट्क्रि॑याता इति॑ । इन्द्रा॑श्वि॒ना म॒धुनः॑ सा॒रघ॑स्येत्या॒ह ।
अ॒श्विभ्या॑मे॒व पूर्वा॑भ्यां ँव॒षट्क॑रोति । अथो॑ अ॒श्विना॑वे॒व
भा॒गधे॑ये॒न स॒मर्द्ध॑यति । 62 (10)

T.A.8.7.6

घ॒र्मम् पा॑त वस॒वो य॑जता वडि॒त्याह॑ । वसू॑ने॒व भा॒गधे॑ये॒न
स॒मर्द्ध॑यति । यद्-व॒षट्कु॑र्यात् । या॒तया॑माऽस्य व॒षट्का॑रः स्यात् ॥
यन्न॑ व॒षट्कु॑र्यात् । रक्षा॑ऽसि य॒ज्ञः ह॑न्युः । वडि॒त्याह॑ ।
प॒रोक्ष॑मे॒व व॒षट्क॑रोति । ना॒स्य या॒तया॑मा व॒षट्का॑रो भ॒वति॑ ।

न यज्ञ॑ रक्षा॑सि घ्नन्ति । 63 (10)

T.A.8.7.7

स्वाहा॑ त्वा॒ सूर्य॑स्य रश्मये॑ वृष्टि॑वनये॑ जुहोमीत्याह । यो वा अस्य॑
पुण्यो॑ रश्मिः । स वृष्टि॑वनिः । तस्मा॑ एवैनम् जुहोति ।
मधु॑ हविरसीत्याह । स्वदय॑त्येवैनम् । सूर्य॑स्य तपस्तपे॑त्याह ।
यथायजुरे॑वैतत् । द्यावापृथि॑वीभ्याम् त्वा परिगृह्णामीत्याह ।
द्यावापृथि॑वीभ्या-मेवैनम् परिगृह्णाति । 64 (10)

T.A.8.7.8

अन्तरिक्षे॑ण त्वोपयच्छामीत्याह । अन्तरिक्षे॑णैवैन-मुपयच्छति ।
न वा एतम् मनु॑ष्यो भर्तु॑मर्हति । देवाना॑म् त्वा पितॄ॑णामनुमतो॑
भर्तु॑ रश्मिः शक्ये॑मिति । देवैरे॑वैनम् पितॄ॑भिरनुमत आदत्ते ।
वि वा एनमे॑तदद्ध्यन्ति । यत् पश्चात् प्रवृ॑ज्य पुरो जुह॑ति ।
तेजो॑ऽसि तेजो॑ऽनु प्रेहीत्याह । तेज ए॒वास्मिन् दधा॑ति ।
दिवि॑स्पृङ्मा मा हि॑सी-रन्तरिक्षस्पृङ्मा मा हिः॑सीः पृथि॑वि
स्पृङ्मा मा हि॑सीरित्याहाहि॑सायै । 65 (10)

T.A.8.7.9

सु॒वर॒सि सु॒व॒र्मे य॒च्छ दि॒वं यँ॑च्छ दि॒वो मा॑ पा॒ही॒त्या॒ह ।
आ॒शि॒ष॒मे॒वैता॒माशा॑स्ते । शि॒रो वा ए॒तद्-य॒ज्ञस्य॑ । यत् प्र॒व॒र्ग्यः ।
आ॒त्मा वा॒युः । उ॒द्यत्य॑ वा॒तना॒मान्या॑ह । आ॒त्मन्ने॒व य॒ज्ञस्य॑ शि॒रः
प्र॒ति॒द॒धाति॑ । अ॒न॒वा॒नम् । प्रा॒णा॒नां स॒न्तत्यै॑ । प॒ञ्चा॒ह । 66 (10)

T.A.8.7.10

पा॒ङ्क्तो य॒ज्ञः । या॒वा॒ने॒व य॒ज्ञः । तस्य॑ शि॒रः प्र॒ति॒द॒धाति॑ । अ॒ग्नये॑ त्वा
व॒सु॒मते॑ स्वा॒हेत्या॑ह । अ॒सौ वा आ॒दि॒त्योऽग्नि॑र्-व॒सु॒मान् ।
तस्मा॑ ए॒वैन॑ज्जुहोति । सो॒माय॑ त्वा रु॒द्रव॑ते स्वा॒हेत्या॑ह । च॒न्द्र॒मा वै
सो॒मो रु॒द्रवा॑न् । तस्मा॑ ए॒वैन॑ज्जुहोति । व॒रु॒णाय॑ त्वाऽऽदि॒त्यव॑ते
स्वा॒हेत्या॑ह । 67 (10)

T.A.8.7.11

अ॒प्सु वै व॒रु॒ण आ॒दि॒त्यवा॑न् । तस्मा॑ ए॒वैन॑ज्जुहोति । बृ॒ह॒स्प॒तये॑ त्वा
वि॒श्वदे॑व्यावते स्वा॒हेत्या॑ह । ब्र॒ह्म वै दे॒वाना॑म् बृ॒ह॒स्प॒तिः ।
ब्र॒ह्म॒ण ए॒वैन॑ज्जुहोति । स॒वि॒त्रे त्व॒र्भु॒मते॑ वि॒भु॒मते॑ प्र॒भु॒मते॑ वा॒ज॒व॑ते
स्वा॒हेत्या॑ह । स॒म्वँ॑त्स॒रो वै स॒वि॒त॒र्भु॒मान् । वि॒भु॒मान् प्र॒भु॒मान् ।

वा॒ज॒वा॒न् । तस्मा॑ ए॒वैन॑ञ्जुहोति । य॒माय॒ त्वाऽङ्गि॑रस्वते पि॒तृ॒मते॒
स्वा॒हेत्या॑ह । प्रा॒णो वै य॒मोऽङ्गि॑रस्वान् पि॒तृ॒मान् । 68 (10)

T.A.8.7.12

तस्मा॑ ए॒वैन॑ञ्जुहोति । ए॒ताभ्य॑ ए॒वैन॑म् दे॒वता॑भ्यो जुहोति ।
द॒श स॒म्पद्य॑न्ते । द॒शाक्ष॑रा वि॒राट् । अ॒न्नं वि॒राट् ।
वि॒राजै॑वान्नाद्यमव॒रुन्धे॑ । रौहि॑णाभ्यां वै दे॒वाः सु॒वर्गं लो॒कमा॑यन् ।
तद्-रौहि॑ण्यो रौहि॒णत्व॑म् । यद्-रौहि॑णौ भवतः । रौहि॑णाभ्यामे॒व
तद्-यज॑मानः सु॒वर्गं लो॒कमे॑ति () । अ॒हर्ज्यो॑तिः के॒तुना॑ जुषताꣳ
सु॒ज्योति॑र्ज्योतिषाꣳ स्वा॒हा रा॒त्रिर्ज्यो॑तिः के॒तुना॑ जुषताꣳ
सु॒ज्योति॑र्ज्योतिषाꣳ स्वा॒हेत्या॑ह । आ॒दि॒त्यमे॒व तद॑मुष्मिन् लो॒केऽह्ना॑
पर॑स्ताद्-दा॒धार । रा॒त्रिया॑ अ॒वस्ता॑त् । तस्मा॑द॒सावा॑दि॒त्यो ऽमु॑ष्मिन्
लो॒केऽहो॑रा॒त्राभ्या॑म् धृ॒तः । 69 (14)

(म॒नु॒ष्य॒ना॒मा॒नि॑ – प॒श॒वः॑ – सी॒द॒त्वि॒त्या – हे॒न्द्रा॒येत्या॑हा – र्द्ध॒यति॑
– घ्न॑न्ति – गृ॒ह्णा – त्याहि॑सायै – पञ्चा॑हा – दि॒त्यव॑ते
स्वा॒हेत्या॑ह – पि॒तृ॒मा – ने॑ति च॒त्वारि॑ च) (A7)

अनुवाकम् – 8

T.A.8.8.1

वि॒श्वा आ॒शा दक्षि॑ण॒सदि॒त्याह॑ । वि॒श्वा॒ने॒व दे॒वान् प्री॑णाति । अथो॒
दु॒रि॒ष्ट्या ए॒वैन॑म् पाति । वि॒श्वा॒न् दे॒वान॑याडि॒हेत्या॑ह । वि॒श्वा॒ने॒व दे॒वान्
भा॒गधे॑येन॒ सम॑र्द्धयति । स्वा॒हाकृ॑तस्य॒ घर्म॑स्य॒ मधोः॑ पि॒बत॑मश्चि॒नेत्या॑ह ।
अश्चि॑नावे॒व भा॒गधे॑येन॒ सम॑र्द्धयति । स्वा॒हाऽग्नये॑ य॒ज्ञिया॑य
शँ॒य॒जुर्भि॑रि॒त्याह॑ । अ॒भ्ये॒वैन॑म् घा॒रय॑ति । अथो॒ ह॒विरे॑वाकः । 70 (10)

T.A.8.8.2

अश्चि॑ना॒ घर्म॑म् पात॑ ह॒र्दि॒वान्-मह॑र्दि॒वाभि॑-रू॒तिभि॑रि॒त्याह॑ ।
अश्चि॑नावे॒व भा॒गधे॑येन॒ सम॑र्द्धयति । अनु॒ वान् द्या॒वापृ॑थि॒वी
म॒सा॒तामि॒त्याहा॑नु॒मत्यै॑ । स्वा॒हेन्द्रा॑य॒ स्वाहेन्द्रा॑ वडि॒त्याह॑ ।
इन्द्रा॑य॒ हि पु॒रो हू॒यते॑ । आ॒श्राव्या॑ह॒ घर्म॑स्य॒ यजे॑ति ।
वष॑ट्कृते॒ जुहो॑ति । रक्ष॑साम॒पहत्यै॑ । अनु॒यज॑ति स्व॒गाकृ॑त्यै ।
घर्म॑मपा॒तमश्चि॑ने॒त्याह॑ । 71 (10)

T.A.8.8.3

पूर्वमे॒वो॒दितम् । उत्तरे॑णाभिगृ॒णाति । अनु॑ वान्-द्यावापृ॒थिवी
अम॑सा॒तामि॒त्याहानु॑मत्यै । तम् प्रा॒व्यम् यथा॑वण्णमो दि॒वे नमः॑
पृथि॒व्या इत्या॑ह । यथा॑यजुरे॒वैतत् । दि॒वि धा इ॒मं य॒ज्ञं य॒ज्ञमि॒मम्
दि॒वि धा इत्या॑ह । सु॒वर्गमे॒वैनम् लो॒कम् गम॑यति ।
दि॒वम् गच्छा॑न्तरि॒क्षम् गच्छ॑ पृथि॒वीम् गच्छे॑त्याह ।
ए॒ष्वे॒वैनम् लो॒केषु॑ प्रति॒ष्ठाप॑यति । पञ्च॑ प्र॒दिशो॑ गच्छे॑त्याह । 72 (10)

T.A.8.8.4

दि॒क्ष्वे॒वैनम् प्रति॑ष्ठापयति । दे॒वान् घ॒र्म॒पान् गच्छ॑ पि॒तृन् घ॒र्म॒पान्
गच्छे॑त्याह । उ॒भये॑ष्वे॒वैनम् प्रति॑ष्ठापयति । यत् पि॒न्वते॑ । व॒र्षु॒कः
प॒र्जन्यो॑ भवति । तस्मा॑त् पि॒न्व॒मानः पु॒ण्यः । यत् प्रा॒ड्पि॒न्वते॑ ।
तद्-दे॒वाना॑म् । यद्-द॒क्षि॒णा । तत्-पि॒तॄ॒णाम् । 73 (10)

T.A.8.8.5

यत् प्र॒त्यक् । तन्-म॒नु॒ष्या॑णाम् । यदु॒दङ्ङ् । तद्-रु॒द्रा॑णाम् ।
प्राञ्च॑मु॒दञ्च॑म् पि॒न्व॒यति॑ । दे॒व॒त्रा॑ऽकः । अथो॑ खलु॑ ।

सर्वा॑ अनु॒ दि॒शः॑ पि॒न्व॒यति॑ । सर्वा॑ दि॒शः॑ स॒मे॒ध॒न्ते॑ ।

अ॒न्तः॑ परि॒धि॑ पि॒न्व॒यति॑ । 74 (10)

T.A.8.8.6

ते॒ज॒सो॑ऽस्क॒न्दा॒य । इ॒षे पी॑पि॒हूर्जे॑ पी॒पि॒ही॒त्या॒ह । इ॒षमे॒वोर्जं॑ य॒ज॒मा॒ने॑
द॒धा॒ति । य॒ज॒मा॒ना॒य पी॑पि॒ही॒त्या॒ह । य॒ज॒मा॒ना॒यै॒वैता॑-मा॒शि॒ष॒मा॒शा॒स्ते॑ ।

म॒ह्य॒ञ्ज्यै॒ष्ट्या॒य पी॑पि॒ही॒त्या॒ह । आ॒त्म॒न ए॒वैता॑मा॒शि॒ष॒मा॒शा॒स्ते॑ ।

त्वि॒ष्यै॑ त्वा द्यु॒म्ना॒य त्वे॒न्द्रि॒या॒य त्वा॒ भू॒त्यै त्वे॒त्या॒ह । य॒था॒य॒जु॒रे॒वैत॑त् ।

ध॒र्मा॑ऽसि सु॒ध॒र्मा मे॑ न्य॒स्मे ब्र॒ह्मा॒णि धा॒रये॑त्या॒ह । 75 (10)

T.A.8.8.7

ब्र॒ह्म॒न्ने॒वैन॑म् प्र॒ति॒ष्ठा॒प॒यति॑ । ने॒त्वा वा॒तः स्क॒न्दा॒या॒दि॒ति य॒द्य॒भि॒चरे॑त् ।

अ॒मु॒ष्य त्वा प्रा॒णे सा॒द॒या॒म्य॒मु॒ना सह॑ नि॒र॒र्थ॒म् ग॒च्छे॒ति ब्रू॒याद्-य॑म्

द्वि॒ष्यात् । यमे॒व द्वे॒ष्टि । ते॒नैन॑ सह॑ नि॒र॒र्थ॒म् ग॒म॒यति॑ । पू॒ष्णे श॒र॒से

स्वा॒हे॒त्या॒ह । या ए॒व दे॒वता॑ हु॒त॒भा॒गाः । ता॒भ्य ए॒वैन॑ञ्जु॒होति॑ ।

ग्रा॒व॒भ्यः॑ स्वा॒हे॒त्या॒ह । या ए॒वा॒न्त॒रि॒क्षे वा॒चः । 76 (10)

T.A.8.8.8

ता॒भ्य ए॒वैन॑ञ्जुहोति । प्र॒तिरे॒भ्यः स्वा॑हेत्याह । प्रा॒णा वै दे॒वाः प्र॒तिराः ।
 ते॒भ्य ए॒वैन॑ञ्जुहोति । द्या॒वापृ॑थि॒वीभ्या॑ स्वा॑हेत्याह ।
 द्या॒वापृ॑थि॒वीभ्या॑-मे॒वैन॑ञ्जुहोति । पि॒तृभ्यो॑ घ॒र्मपे॑भ्यः स्वा॑हेत्याह ।
 ये वै यज्वा॑नः । ते पि॒तरो॑ घ॒र्मपाः । ते॒भ्य ए॒वैन॑ञ्जुहोति । 77 (10)

T.A.8.8.9

रु॒द्राय॑ रु॒द्रहो॑त्रे स्वा॑हेत्याह । रु॒द्रमे॒व भा॑ग॒धेये॑न स॒मर्द्ध॑यति ।
 स॒र्वतः॑ स॒मन॑क्ति । स॒र्वत॑ ए॒व रु॒द्रन्नि॑रव॒दय॑ते । उ॒दञ्च॑न्निर॒स्यति॑ ।
 ए॒षा वै रु॒द्रस्य॑ दिक् । स्वा॒यामे॒व दि॒शि रु॒द्रन्नि॑रव॒दय॑ते ।
 अ॒प उ॒पस्पृ॑शति मे॒द्ध्य॑त्वाय । ना॒न्वीक्षे॑त । यद॒न्वीक्षे॑त । 78 (10)

T.A.8.8.10

चक्षु॑रस्य प्र॒मायु॑क स्वा॑त् । तस्मा॑न्ना॒न्वीक्ष्यः॑ । अ॒पीप॑रो माऽहो॑
 रा॒त्रियै॑ मा पा॒ह्येषा॑ ते अ॒ग्ने स॒मित्तया॑ स॒मिद्ध्य॑स्वा॒युर्मे दा॑ वर्च॒सा
 माऽञ्जी॑रित्याह । आ॒युरे॒वास्मिन्॑ वर्चो॑ दधाति । अ॒पीप॑रो मा रा॒त्रिया॑
 अ॒हो मा पा॒ह्येषा॑ ते अ॒ग्ने स॒मित्तया॑ स॒मिद्ध्य॑स्वा॒युर्मे दा॑ वर्च॒सा
 माऽञ्जी॑रित्याह । आ॒युरे॒वास्मिन्॑ वर्चो॑ दधाति । अ॒ग्निर्-ज्योति॑र्-

ज्योति॑र॒ग्निः स्वा॒हा सूर्यो॑ ज्योति॑ज्योतिः॒ सूर्यः॑ स्वाहेत्याह ।

यथा॑यजु॒रेवै॑तत् । ब्र॒ह्मवा॑दिनो॒ वद॑न्ति ।

हो॒तव्य॑म॒ग्निहो॑त्रा(३) न्न हो॒तव्या॑(३) मिति । 79 (10)

T.A.8.8.11

यद्-यजु॑षा जुहु॒यात् । अय॑थापूर्वमाहु॒ती जुहु॑यात् । यन्न जुहु॒यात् ।

अ॒ग्निः परा॑भवेत् । भूः स्वाहेत्ये॒व हो॒तव्य॑म् । यथा॑पूर्वमाहु॒ती जुहो॑ति ।

ना॒ग्निः परा॑भवति । हु॒तः ह॒विर्मधु॑ ह॒विरि॑त्याह । स्व॒दय॑त्ये॒वैन॑म् ।

इन्द्र॑तमे॒ऽग्नावि॑त्याह । 80 (10)

T.A.8.8.12

प्रा॒णो वा इन्द्र॑तमो॒ऽग्निः । प्रा॒ण ए॒वैन॑मिन्द्र॑तमे॒ऽग्नौ जुहो॑ति ।

पि॒ता नो॑ऽसि मा मा हि॒ऽसीरि॑त्याहाहि॒ऽसायै॑ । अ॒श्याम॑ ते दे॒व घ॑र्म

मधु॑मतो वाज॒वतः॑ पि॒तुमत॑ इत्याह । आ॒शिष॑मे॒वैता॑माशास्ते ।

स्व॒धावि॑नो॒ऽशीम॑हि त्वा मा मा हि॒ऽसी-रि॑त्याहाहि॒ऽसायै॑ ।

तेज॑सा वा ए॒ते व्य॑द्ध्यन्ते । ये प्र॒वर्ग्ये॑ण चरन्ति । प्रा॒श्न॑न्ति ।

तेज॑ ए॒वात्म॑न्-दधते । 81 (10)

T.A.8.8.13

स॒म्व॑त्स॒रन्न॒ मा॒ऽस॒म॒श्जी॑यात् । न॒ रा॒मा॒मु॒पे॑यात् । न॒ मृ॒न्म॒र्ये॑न॒ पि॒बेत् ।
 ना॒स्य॒ रा॒म उ॒च्छि॑ष्टम् पि॒बेत् । ते॒ज ए॒व त॒त्स॒श्य॑ति । दे॒वा॒सु॒राः
 स॒म्य॑त्ता आ॒सन् । ते दे॒वा वि॒ज॒यमु॑प॒यन्तः॑ । वि॒भ्रा॒जि सौ॒र्ये॑ ब्र॒ह्म
 स॒न्त्य॑द॒धत॑ । यत् किञ्च॑ दि॒वाकी॑र्त्यम् । तदे॒तेनै॑व व्र॒तेना॑गोपायत् () ।
 तस्मा॑दे॒तद्-व्र॑तम् चा॒र्यम् । ते॒जसो॑ गोपी॒थाय॑ । तस्मा॑दे॒तानि॑ यजू॒षि
 वि॒भ्रा॒जः सौ॒र्यस्ये॑त्याहुः । स्वाहा॑ त्वा सूर्य॑स्य र॒श्मि॒भ्य इति॑ प्रा॒तः
 स॒ऽसा॑द॒यति॑ । स्वाहा॑ त्वा नक्ष॑त्रेभ्य इति॑ सा॒यम् ।
 ए॒ता वा ए॒तस्य॑ दे॒वताः॑ । ताभि॑रे॒वैन॑ऽस॒म॒र्द्ध॑यति । 82 (17)

(अ॒क - र॒श्मिने॑त्याह - प्र॒दिशो॑ ग॒च्छे॑त्याह - पि॒तृणा॑ - म॒न्तः
 परि॑धि पि॒न्व॑यति - धा॒रये॑त्याह - वा॒चो - ध॒र्मपा॑ स्ते॒भ्य
 ए॒वैन॑म् जुहो - त्यन्वी॑क्षे॒त - हो॒तव्या॑ (3) मि - त्य॒ग्रावि॑त्याह -
 द॒धते॑ - ऽगो॑पायथ् स॒प्त च॑) (A8)

अनुवाकम् – 9

T.A.8.9.1

घर्म॑ या ते दि॒वि शु॒गिति॑ ति॒स्र आहु॑तीर्-जुहोति । छन्दो॑भिरे॒वास्यै॒भ्यो
लो॒केभ्यः॑ शुच॑मव यजते । इ॒यत्य॑ग्रे जुहोति । अथे॒यत्यथे॑यति ।
त्रय॑ इमे लो॒काः । ए॒भ्य ए॒व लो॒केभ्यः॑ शुच॑मव यजते ।
अनु॑ नोऽद्यानु॑मतिरित्या॒हानु॑मत्यै । दि॒वस्त्वा पर॑स्पाया इत्या॒ह । दि॒व
ए॒वेमान् लो॒कान् दा॑धार । ब्र॒ह्मण॑स्त्वा पर॑स्पाया इत्या॒ह । 83 (10)

T.A.8.9.2

ए॒ष्वे॒व लो॒केषु॑ प्र॒जा दा॑धार । प्रा॒णस्य॑ त्वा पर॑स्पाया इत्या॒ह ।
प्र॒जास्वे॒व प्रा॒णान् दा॑धार । शि॒रो वा ए॒तद्-य॑ज्ञस्य ।
यत् प्र॑वर्ग्यः । अ॒सौ खलु॑ वा आ॒दित्यः॑ प्र॑वर्ग्यः । तं य॑द्-दक्षि॒णा
प्र॒त्यञ्च॑-मु॒दञ्च॑-मु॒द्वास॑येत् । जिह्वां य॑ज्ञस्य शि॒रो ह॑रेत् ।
प्राञ्च॑मु॒द्वास॑यति । पु॒रस्ता॑दे॒व य॑ज्ञस्य शि॒रः प्र॑तिदधाति । 84 (10)

T.A.8.9.3

प्राञ्च॑मु॒द्वास॑यति । तस्मा॑द॒सावा॑दि॒त्यः पु॒रस्ता॑दु॒देति॑ ।
श॒फोप॑यमा॒न्धवि॑त्राणि धृ॒ष्टी इ॒त्यन्व॑वहरन्ति ।

सा॒त्मा॒नमे॒वैन॑ꣳ स॒तनु॑म् करोति । सा॒त्माऽमु॑ष्मिन् लो॒के भ॑वति ।

य ए॒वं वै॑द । औ॒दु॒म्बरा॑णि भवन्ति । ऊ॒र्वा उ॒दु॒म्बरः॑ ।

ऊ॒र्जमे॒वावरु॑न्धे । वर्त्त॑ना वा अ॒न्वित्य॑ । 85 (10)

T.A.8.9.4

यज्ञ॑ꣳ रक्षाꣳसि जिघाꣳसन्ति । साम्ना॑ प्रस्तो॒ताऽन्व॑वैति ।

साम॑ वै रक्षो॒हा । रक्ष॑सामप॒हत्यै॑ । त्रि॒र्नि॒धन॑मुपैति । त्रय॑ इ॒मे लो॒काः ।

ए॒भ्य ए॒व लो॒केभ्यो॑ रक्षाꣳस्यप॒हन्ति॑ । पु॒रुषः॑पु॒रुषो॑ नि॒धन॑मुपैति ।

पु॒रुषः॑पु॒रुषो॑ हि रक्ष॒स्वी । रक्ष॑सामप॒हत्यै॑ । 86 (10)

T.A.8.9.5

यत् पृ॒थि॒व्यामु॑द्वास॒येत् । पृ॒थि॒वीꣳ शु॒चाऽर्प॑येत् । यद॒प्सु ।

अ॒पः शु॒चा॒र्पये॑त् । यदो॑ष॒धीषु॑ । ओ॒ष॒धीः शु॒चाऽर्प॑येत् ।

यद्-व॒नस्प॑तिषु । व॒नस्प॑तीꣳशु॒चाऽर्प॑येत् । हि॒र॒ण्य॒न्नि॒धायो॑द्वासयति ।

अ॒मृतं॑ वै हि॒र॒ण्यम् । 87 (10)

T.A.8.9.6

अ॒मृत॑ ए॒वैन॑म् प्र॒तिष्ठा॑पयति । व॒ल्गु॑र॒सि शं॑ यु॒धाया॑ इति त्रिः

प॒रिषि॑ञ्च॒न्य॒र्येति॑ । त्रि॒वृ॒द्धा अ॒ग्निः । या॒वा॒ने॒वाग्निः॑ ।

तस्य शुचं शमयति । त्रिः पुनः पर्येति । षट्थं सम्पद्यन्ते ।

षड्वा ऋतवः । ऋतुभिरेवास्य शुचं शमयति ।

चतुः सक्तिर्नाभिर्. ऋतस्येत्याह । 88 (10)

T.A.8.9.7

इयं वा ऋतम् । तस्या एष एव नाभिः । यत् प्रवर्ग्यः । तस्मादेवमाह ।

सदो विश्वायुरित्याह । सदो हीयम् । अप द्वेषो अप ह्वर इत्याह

भ्रातृव्यापनुत्यै । घर्मेतत्तेऽन्नमेतत् पुरीषमिति दद्धना मधुमिश्रेण

पूरयति । ऊर्वा अन्नाद्यन्दधि । ऊर्जैर्वैनमन्नाद्येन समर्द्धयति । 89 (10)

T.A.8.9.8

अनशनायुको भवति । य एवं वेद । रन्तिर्नामासि दिव्यो गन्धर्व

इत्याह । रूपमेवास्यै-तन्-महिमानं रन्तिम् बन्धुतां व्याचष्टे ।

समहमायुषा सम् प्राणेनेत्याह । आशिषमेवैतामाशास्ते ।

व्यसौ योऽस्मान् द्वेष्टि यञ्च वयम् द्विष्म इत्याह । अभिचार

एवास्यैषः । अचिक्रदद्-वृषा हरिरित्याह । वृषा ह्येषः । 90 (10)

T.A.8.9.9

वृषा॑ हरिः॑ । महान्-मि॒त्रो न दर्श॑त इत्याह॑ । स्तौत्ये॒वैनमे॑तत् ।
चिद॑सि समु॒द्रयो॑निरित्याह॑ । स्वामे॒वैनं यो॑निङ्गमयति॑ । नमस्ते॑ अस्तु॒
मा मा॑ हि॒सीरित्या॑हाहि॒सायै॑ । विश्वावसु॑ सोमगन्धर्वमि॒त्याह॑ ।
यदे॒वास्य क्रि॒यमाण॑स्यान्तर्य॑न्ति । तदे॒वास्यैते॑ना प्याययति॑ ।
विश्वावसु॑रभि॒ तन्नो॑ गृणा॒त्वित्या॑ह । 91 (10)

T.A.8.9.10

पूर्वमे॒वोदित॑म् । उत्तरे॑णाभिगृणाति॑ । धियो॑ हि॒न्वानो॑ धिय॒ इन्नो॑
अव्या॑दित्याह॑ । ऋतू॒नेवास्मै॑ कल्पयति॑ । प्रा॒साम् गन्ध॑र्वो अमृ॒तानि॑
वोच॑दित्याह॑ । प्रा॒णा वा अमृ॑ताः । प्रा॒णाने॒वास्मै॑ कल्पयति॑ ।
एत॑त्त्वन्दे॒व घर्म॑ दे॒वो दे॒वानु॑पागा इत्याह॑ । दे॒वो ह्येष॑ सन्दे॒वानु॑पैति॑ ।
इद॑महम् मनु॒ष्यो मनु॑ष्या॒नित्या॑ह । 92 (10)

T.A.8.9.11

मनु॒ष्यो हि॑ । एष॑ सन्-मनु॒ष्यानु॑पैति॑ । ई॒श्वरो॑ वै प्र॒वर्ग्य॑मु॒द्वासय॑न् ।
प्र॒जाम् प॒शून्थ॑ सोमपी॒थमनू॑द्वासः॑ सोमपी॒थानु॑मेहि॑ । सह॑ प्र॒जया॑
सह॑ रा॒यस्पोषे॑णेत्याह॑ । प्र॒जामे॒व प॒शून्थ॑ सोमपी॒थमा॑त्मन् धत्ते॑ ।

सु॒मित्रा॑ न॒ आप॒ ओष॑धयः सन्त्वित्याह । आशिष॑मे॒वैता॑माशास्ते ।
 दु॒र्मित्रा॑स्तस्मै॑ भूयासु॒र्-योऽस्मान्-द्वेष्टि॑ यज्च॒ वयम्॑ द्विष्म॒ इत्या॑ह ।
 अ॒भिचार॑ ए॒वास्यैषः॑ () । प्र॒ वा ए॒षोऽस्मान्॑ लो॒काच्च्य॑वते ।
 यः प्र॒वर्ग्य॑मु॒द्वास॑यति । उ॒दु॒ त्यम् चि॒त्रमि॑ति सौरी॑भ्यामृ॒ग्भ्याम् पुन॑रेत्य॒
 गा॒र्हप॑त्ये जुहोति । अय॑ँ वै लो॒को गा॒र्हप॑त्यः । अ॒स्मिन्ने॒व लो॒के
 प्र॒ति॒तिष्ठ॑ति । असौ॒ खलु॒ वा आ॑दि॒त्यः सु॒वर्गो॑ लो॒कः ।
 यथ् सौरी॑ भवतः । तेनै॒व सु॒वर्गान्॑ लो॒कान्नै॑ति । 93 (18)

(ब्र॒ह्मण॑स्त्वा॒ पर॑स्पाया॒ इत्या॑ह – द॒धा – त्य॑न्वित्य॑ – रक्ष॑स्वी रक्ष॑सा
 म॒प॒ह॒त्यै – वै हि॑रण्य – मा॒हा – र्द्ध॑यति – ह्ये॒ष – गृ॑णा॒त्वित्या॑ह –
 म॒नु॒ष्या॑नित्या॒हा – स्यै॒षोऽष्टौ॑ च) (A9)

अनुवाकम् – 10

T.A.8.10.1

प्र॒जाप॑तिंँ वै दे॒वाः शु॒क्रम् प॑योऽदु॒हन् । तदे॑भ्यो॒ न व्य॑भवत् ।
 तद॒ग्नि॑र्व्य॒करो॑त् । तानि॒ शुक्रि॑याणि॒ सामा॑न्यभवन् ।
 तेषांँ यो रसोऽत्य॑क्षरत् । तानि॒ शुक्र॑यजू॒ष्यभ॑वन् ।

शुक्रि॑याणां॒ वा॒ ए॒तानि॑ शुक्रि॑याणि । साम॒पय॑स्मँ॒वा ए॒तयो॑रन्यत् ।

दे॒वाना॑मन्यत्पयः । यद्गोः॑ पयः । 94 (10)

T.A.8.10.2

तथ् साम्नः॑ पयः । यदजा॑यै पयः । तद्-दे॒वाना॑म् पयः । तस्माद्-

यत्रै॒तैर्-यजु॑र्भिश्चरन्ति । तत् पय॑सा चरन्ति । प्रजा॑पतिमेव

तद् दे॒वान्यप॑यसाऽन्नाद्येन॑ सम॒र्द्धय॑न्ति । एष ह त्वै सा॒क्षात् प्र॑वर्ग्यम्

भक्ष॑यति । यस्यै॒वं वि॒दुषः॑ प्र॒वर्ग्यः॑ प्रवृ॒ज्यते॑ ॥ उत्तर॑वेद्या-मुद्वा॒सये॑त्-

तेज॑स्कामस्य । तेजो॑ वा उत्तर॑वेदिः । 95 (10)

T.A.8.10.3

तेजः॑ प्र॒वर्ग्यः॑ । तेज॑सैव तेजः॑ सम॒र्द्धय॑ति । उत्तर॑वेद्या-

मुद्वा॒सये॑-दन्नकामस्य । शिरो॑ वा ए॒तद्-यज्ञ॑स्य । यत् प्र॒वर्ग्यः॑ ।

मुख॑मुत्तर॑वेदिः । शी॒र्ष्णैव॑ मुख॑ स॒न्दधा॑त्यन्नाद्याय । अन्ना॑द ए॒व

भव॑ति । यत्र॑ खलु॒ वा ए॒तमुद्वा॑सितं॒ वया॑सि॒ पर्या॑सते ।

परि॒ वै ता॑ स॒माम् प्र॒जा वया॑स्यासते ॥ 96 (10)

T.A.8.10.4

तस्मा॑-दुत्तरवे॑द्या-मे॒वो॒द्वासये॑त् । प्र॒जाना॑म् गोपी॒थाय॑ ।
पु॒रो वा प॒श्चाद्वो॑द्वासये॑त् । पु॒रस्ता॒द्वा ए॒तज्ज्योति॑रुदेति ।
तत् प॒श्चान्नि॑म्रोचति । स्वा॒मे॒वैन॑म् यो॒निम॑नूद्वासयति ।
अ॒पाम् म॒द्ध्य उ॒द्वासये॑त् । अ॒पां वा ए॒तन्म॒द्ध्या-ज्ज्योति॑रजायत ।
ज्योतिः॑ प्रव॒र्ग्यः । स्व ए॒वैनं॑ यो॒नौ प्र॑तिष्ठापयति । 97 (10)

T.A.8.10.5

यम् द्वि॒ष्यात् । यत्र॑ स स्यात् । तस्या॑म् दि॒शुद्वासये॑त् । ए॒ष वा
अ॒ग्निर्-वै॒श्वान॑रः । यत्-प्र॒वर्ग्यः॑ । अ॒ग्निनै॒वैनं॑ वै॒श्वान॑रेणाभि
प्रव॑र्तयति । औ॒दु॒म्ब॒र्यां शा॒खाया॑मुद्वासये॑त् । ऊ॒र्वा उ॒दु॒म्ब॒रः ।
अ॒न्नम् प्रा॑णः । शु॒ग्ध॒र्मः । 98 (10)

T.A.8.10.6

इ॒दम॒ह-म॒मुष्या॑मु॒ष्याय॑णस्य शु॒चा प्रा॑णमपि द॒हामी॑त्याह । शु॒चैवा॑स्य
प्रा॑णमपि द॒हति॑ । ता॒जगा॑र्तिमा॒र्च्छति॑ । यत्र॑ द॒र्भा उप॑दी॒कस॑न्तताः
स्युः । तदु॒द्वासये॑द्-वृ॒ष्टिका॑मस्य । ए॒ता वा अ॒पाम॑नू॒ज्झाव॑र्यो॒ नाम॑ ।
यद्-द॒र्भाः । अ॒सौ ख॒लु वा आ॑दि॒त्य इ॒तो वृ॒ष्टिमु॑दीरयति ।

अ॒सावे॒वास्मा॑ आ॒दित्यो॑ वृ॒ष्टि॒न्निय॑च्छति । ता आपो॑ निय॒ता ध॑न्व॒ना
यन्ति॑ () । 99 (10) (गोः॑ पय॑ – उत्तर॒वेदि॑ – रा॒सते॑ – स्थाप॑यति –
घर्मो॑ – यन्ति॑) (A10)

अनुवाकम् – 11

T.A.8.11.1

प्र॒जाप॑तिः स॒म्भ्रिय॑माणः । स॒म्राट् थ् स॒म्भृतः॑ । घ॒र्मः प्र॑वृ॒क्तः ।
महा॑वीर उ॒द्वासि॑तः । अ॒सौ ख॒लु वा॒वैष आ॑दित्यः । यत् प्र॑व॒र्ग्यः ।
स ए॒तानि॑ नामान्य॒कुरु॑त । य ए॒वं वै॑द । वि॒दुरे॒नन्ना॑म्ना ।

ब्र॒ह्मवा॑दिनो॑ वदन्ति । 100 (10)

T.A.8.11.2

यो वै व॒सीया॑ꣳ स॒म्य॑थाना॒ममु॑प॒चर॑ति । पु॒ण्या॑र्तिं॑ वै स तस्मै॑
का॒मय॑ते । पु॒ण्या॑र्तिम॒स्मै का॑मयन्ते । य ए॒वं वै॑द । तस्मा॑दे॒वं वि॒द्वान् ।
घ॒र्म इति॑ दि॒वाऽऽच॑क्षीत । स॒म्राडि॑ति न॒क्तम् । ए॒ते वा ए॒तस्य॑ प्रि॒ये
त॒नुवौ॑ । ए॒ते अ॑स्य प्रि॒ये ना॑मनी । प्रि॒ययै॑वैनम् त॒नुवा॑ । 101 (10)

T.A.8.11.3

प्रि॒येण॑ ना॒म्ना॒ सम॑र्द्धयति । की॒र्तिर॑स्य पूर्वा गच्छति जनता॑मायतः ।
गाय॑त्री दे॒वेभ्यो॑ऽपाक्रामत् । तान्दे॒वाः प्र॑वर्ग्येणै॒वानु॑ व्यभवन् ।
प्र॒वर्ग्ये॑णाप्नुवन् । यच्च॑तुर्विंशतिः कृ॒त्वः प्र॑वर्ग्यम् प्रवृ॑णक्ति ।
गाय॑त्रीमेव तदनु विभवति । गाय॑त्रीमाप्नोति । पूर्वा॑ऽस्य जनं यतः
की॒र्तिर्गच्छ॑ति । वैश्व॑देवः स॒ऽसन्नः । 102 (10)

T.A.8.11.4

वस॑वः प्रवृ॑क्तः । सोमो॑ऽभिकीर्यमाणः । आ॒श्विनः॑ पय॑स्यानीयमाने ।
मा॒रुतः॑ क्वथन् । पौ॒ष्ण उद॑न्तः । सा॒रस्व॑तो विष्यन्दमानः ।
मै॒त्रः शरो॑ गृहीतः । तेज॑ उद्यतो वा॒युः । हि॒यमाणः॑ प्र॒जाप॑तिः ।
हू॒यमानो॑ वाग्धु॒तः । 103 (10)

T.A.8.11.5

असौ॑ खलु वावैष आ॒दित्यः॑ । यत् प्र॑वर्ग्यः । स ए॒तानि॑ नामा॒न्यकुरु॑त ।
य एवं॑ वैद । विदु॑रेनन्नाम्ना । ब्र॒ह्मवा॑दिनो वदन्ति । यन्मृ॑न्मय-
माहु॑तिन्नाश्नुतेऽथ । कस्मा॑देषोऽश्नु॒त इति॑ । वा॒गेष॑ इति ब्रूयात् ।
वा॒च्येव॑ वाचम् दधाति । 104 (10)

T.A.8.11.6

तस्माद॑श्नु॒ते । प्र॒जाप॑ति॒र्वा ए॒ष द्वा॑द॒शधा॑ वि॒हितः॑ । यत् प्र॑व॒र्ग्यः॑ ।

यत् प्रा॑गवका॒शेभ्यः॑ । तेन॑ प्र॒जा अ॑सृजत । अवका॒शैर्-

दे॒वासु॑रान॒सृजत॑ । यदू॒र्ध्वम॑वका॒शेभ्यः॑ । तेना॒न्नम॑सृजत ।

अ॒न्नम् प्र॒जाप॑तिः । प्र॒जाप॑ति॒र्वावै॑षः () । 105 (10)

(वद॑न्ति - तनु॒वा - स॒स॒न्नो - हू॒यमा॑नो वाग्धु॒तो - द॒धा -

त्ये॑षः (A11)

अनुवाकम् - 12

T.A.8.12.1

स॒विता॑ भू॒त्वा प्र॑थमेऽह॒न् प्र॑वृज्यते । तेन॑ का॒मा ए॒ति ।

यद्-द्वि॒तीयेऽह॑न्-प्र॑वृज्यते॑ । अ॒ग्निर्-भू॒त्वा दे॒वाने॑ति ।

यत्-तृ॒तीयेऽह॑न्-प्र॑वृज्यते॑ । वा॒युर्-भू॒त्वा प्रा॑णानेति । यच्चतु॒र्थेऽह॑न्-

प्र॑वृज्यते॑ । आ॒दि॒त्यो भू॒त्वा र॒श्मीने॑ति । यत् पञ्च॒मेऽह॑न्-प्र॑वृज्यते॑ ।

च॒न्द्र॒मा भू॒त्वा न॑क्षत्राण्येति । 106 (10)

T.A.8.12.2

यथ्-षष्ठेऽहन्-प्रवृज्यते ॥ ऋतुर्-भूत्वा सम्वत्सरमेति ।
यथ्-सप्तमेऽहन्-प्रवृज्यते ॥ धाता भूत्वा शक्वरीमेति ।
यदष्टमेऽहन्-प्रवृज्यते ॥ बृहस्पतिर्-भूत्वा गायत्रीमेति ।
यन्-नवमेऽहन्-प्रवृज्यते ॥ मित्रो भूत्वा त्रिवृत इमां लोकांनेति ।
यद्-दशमेऽहन्-प्रवृज्यते ॥ वरुणो भूत्वा विराजमेति । 107 (10)

T.A.8.12.3

यदेकादशेऽहन्-प्रवृज्यते ॥ इन्द्रो भूत्वा त्रिष्टुभमेति ।
यद्-द्वादशेऽहन्-प्रवृज्यते ॥ सोमो भूत्वा सुत्यामेति ।
यत्-पुरस्तादुपसदाम् प्रवृज्यते ॥ तस्मादितः पराङ्मूं
लोकांस्तपन्नेति । यदुपरिष्ठा-दुपसदाम् प्रवृज्यते ॥
तस्मादमुतोऽर्वाङ्निमां लोकांस्तपन्नेति । य एवं वेद ।
एव तपति () । 108 (10)

(नक्षत्राण्येति – विराजमेति – तपति) (A12)

Prapaataka Korvai with starting Padams of 1 to 12 Anuvaakams :-

दे॒वा वै स॒त्रꣳ – सा॒वि॒त्रम् – परि॒श्रि॒ते – ब्र॒ह्मन् प्र॑च॒रि॒ष्यामो –
ऽग्नि॑ष्ट्वा – शि॒रो ग्री॒वा – दे॒वस्य॑ र॒शनां॑ – वि॒श्वा आ॒शा –
ध॒र्म या ते॑ – प्र॒जाप॑तिꣳ शु॒क्रम् – प्र॒जाप॑तिः स॒म्भ्रि॑यमाणः –
स॒वि॒ता भू॒त्वा द्वा॑दश)

Korvai with starting Padams of 1, 11, 21 Series of Dasinis :-

(दे॒वा वै स॒त्रꣳ – स ख॑दि॒रः – परि॒श्रि॒ते – ऽभि॑पूर्व – म॒थो
र॒क्ष॒साम् – ग्रै॒ष्मावे॒वास्मै॑ – ब्र॒ह्म वै दे॒वाना॑ – म॒श्वि॒ना घ॒र्मम्
पा॒तम् – प्रा॒णो वै – वृ॒षा ह॒रिर् – यो वै व॑सी॒याꣳ स॒म्य॑थानाम
म॒ष्टौत्तर॑शतम्)

First and Last Padam in TA, 8th Prapaatakam :-

(दे॒वा वै स॒त्र – मै॒व त॑पति)

। ह॒रिः ओम् ।

। कृष्ण यजुर्वेदीय तैत्तिरीय आरण्यके अष्टमः प्रपाठकः समाप्तः ।

। इति तैत्तिरीय यजुरारण्यकम् समाप्तम् ।

=====

Details of Dasini&Vaakyams for – Prapaatakam No.8 – (TA 8)

	Dasini	Vaakyams
Anuvakam 1	7	77
Anuvakam 2	13	138
Anuvakam 3	9	98
Anuvakam 4	13	132
Anuvakam 5	3	38
Anuvakam 6	12	124
Anuvakam 7	12	124
Anuvakam 8	13	137
Anuvakam 9	11	118
Anuvakam 10	6	60
Anuvakam 11	6	60
Anuvakam 12	3	30
Total →	108	1136

For Full Aranyakam

	Anuvaakam	Dasini	Vaakyam
Prapaatakam1	32	130	1396
Prapaatakam2	20	20	117
Prapaatakam3	21	53	501
Prapaatakam4	12	27	280
Prapaatakam5	15	44	634
Prapaatakam6	80	101	579
Prapaatakam7	42	94	840
Prapaatakam8	12	108	1136
Total →	234	577	5483